


十七 史商榷

三



史商榷  
(三)

王鳴盛撰

# 十七史商榷卷十一

## 漢書五

### 志次當改

志之次。一律麻。二禮樂。三刑法。四食貨。五郊祀。六天文。七五行。八地理。九溝洫。十篆文。竊謂先後顛倒。敍次錯雜。殊屬無理。愚見當改爲一天文。二五行。三律麻。四地理。五溝洫。六食貨。七禮樂。八郊祀。九刑法。十篆文。如此方順。改河渠爲溝洫。名實不相應。亦非故後世無從者。

### 律麻本劉歆

班氏自言律麻志本之劉歆。續志亦云然。

### 度權量等名

律麻志。度者。分寸丈尺引也。分本度之名。今人乃以爲權之名。不知起何時。又權者。銖兩斤鈞石也。石本權之名。而今乃以爲量之名。志。十斗爲斛。今改爲五斗爲斛。而十斗爲石。又以十忽爲一絲。十絲爲一毫。十毫爲一分。十分爲一錢。皆未詳所起。再考。

合龠爲合。汲古同。南監與他本或作十龠爲合。尙書堯典疏所引同。此誤也。說詳尙書後案。

古尺小於今尺。是以步數畝數里數皆古小今大。詳見後案皋陶謨篇。古量亦小於今量。後書南蠻傳云。軍行日三十里爲程。人日稟五升。李賢注云。古升小故曰五升也。是後漢時量小於今甚遠。竊謂古今人腹則同。今雖極健啖之人。每日食至多亦不能至二升。而此乃言五升。是後漢量小於今且一二倍也。說亦詳後案堯典篇。魏志管寧傳末注。扈累嘉平中年八九十。縣官給廩日五升不足食。晉書第一卷司馬懿紀。與諸葛亮相拒於五丈原。亮使至。帝問諸葛公食可幾米。對曰三四升。帝曰。孔明其能久乎。蜀志亮傳。注作食不至數升。宋王楙野客叢書第十一卷。歷引周禮廩人注。魏李悝。漢趙充國。匈奴傳及後漢南蠻傳。與晉顧臻之言證古量之小。其第十一卷又引北史庫伏連性客。家口人食米二升。常有饑色。南北朝量比漢魏前已略大。然比今量則尙小。

疇人

疇人子弟李奇曰。同類之人俱明麻者也。如淳曰。家業世世相傳爲疇。師古是如說。案尙書洪範九疇。鄭康成及僞孔傳皆訓疇爲類。易否九四。疇離祉。九家注云。疇者類也。然則李奇是如淳非。程大昌演繁露乃云。古字假借。疇人卽籌人以筭數而名。尤謬也。樂官亦曰疇人。則不必定屬治筭數者矣。

太初三統麻

武帝太初元年詔。大中大夫公孫卿、壺遂、太史令司馬遷、方士唐都落閼造太初曆。定東西立晷儀。下

漏刻以追二十八宿相距於四方舉終以定朔晦分至躔離弦望數語造厤之要已盡自太初厯出古厯皆廢至成帝時劉向作五紀論平帝時王莽秉政向子歆又作三統厯及譜三統厯大抵皆祖述太初者

### 驚蟄雨水穀雨清明

諶營初危十六度立春中營室十四度驚蟄今曰雨水於夏爲正月商爲二月周爲三月終於奎四度降婁初奎五度雨水今爲四月周爲五月中婁四度春分於夏爲二月商爲三月周爲四月終於胃六度大梁初胃七度穀雨今曰中昴八度清明今曰穀雨於夏爲三月商爲五月終於畢十一度案大戴禮夏小正篇逸周書時令解俱先驚蟄後雨水先穀雨後清明與漢志同新舊唐書先啓蟄後雨水亦同而改穀雨在清明之後至宋史始先雨水後驚蟄先清明後穀雨則與唐同元史亦然明程榮者彙刻漢魏叢書內有京房易傳亦先雨水後驚蟄先清明後穀雨俗刻可疑

### 五德相代

顓頊高陽氏水德水生木故帝諧高辛氏爲木德木生火故唐堯火德火生土故虞爲土德土生金禹爲金德金生水湯爲水德水生木周爲木德云云案後漢書郎顗傳顗條便宜對曰孔子曰三百四歲爲一德五德千五百二十歲五行更用注易乾鑿度孔子曰立德之數先立木金水火土德名三百四歲五德備凡千五百二十歲太終復初故曰五行更用更猶變改也乾鑿度在緯書中最爲可信據此則知五德

相代。其說出於孔子。但孔子言三百四歲一德。漢志卻言一代一德。歷代運數短長不定。假如夏、商、周傳世皆數百年。決無既定爲一德矣。三百四歲後。忽又更易一德之事。則孔子亦言其理而已。不必泥漢志是也。且此五德之運。王者循環相代。而所尚之色。卻不用五色者。以三正也。建子者。物初生。色赤。故尚赤。建丑者。物漸箸。色白。故尚白。建寅者。物已成形。色黑。故尚黑。或作青亦可。禮記或素或青。夏造殷因下。鄭注有此一條。大凡物之成形。有黑者亦有青。舜典三帛。鄭注甚明。詳尚書後案一卷。又此三正臨時酌用。不必一定。挨次循環。所以夏建寅之後。商不必從子起。卻建丑。而周卻建子。參錯不齊。然與五德無涉。又五運相代。取相生。不取相尅。周木德也。宗靈威仰。木生火。秦人應以火德王。乃秦始皇本紀云。始皇推終始五德之傳。以爲周得火德。秦代周。從所不勝。而用水德。遂以十月爲正。誤以周爲火。又誤以相生爲相尅。又誤以五德改正朔。一事而三誤。秦人不學如此。至漢則繼周不繼秦。故用火德尚赤。王莽用土德代漢。又因漢稱堯後。亦自稱舜後。明正當受漢禪也。亦可笑矣。至魏始以土德繼漢。色尚黃。

張蒼傳。蒼推漢爲水德。是承秦而不改。公孫臣又上書謂漢當用土德。是亦承秦而言之。以秦人應火德故耳。無如秦已誤用水矣。奈何漢又用土乎。抑或又誤用相尅之說乎。皆非也。

伐紂年月日

三統上元至伐紂之歲十四萬二千一百九歲云云。案厤法逆推而上。可以追溯前世者。正孟子所謂千

歲之日至可坐而致。至於古帝王歷年之多少。國運之長短。則非麻所能推。既無史編紀載。何從測驗。此律麻志所載。得之劉歆。而歆說似未必可信。蓋史記共和以前無紀年也。至於文王受命九年而崩。九年當作七年。又言歲在鶉火云云。本之國語。則不誤。皆詳予尙書後案太誓序。又引武成逸文。惟一月壬辰云云。皆不誤。逸周書世俘解。與此紀日不同。是逸周書傳寫之誤。當晉孔晁爲注時已誤矣。詳見後辨。又劉歆以死魄爲朔。生魄爲望。亦非。亦見後辨。

### 律麻逸文

吳江沈彤冠雲云。春秋左傳襄二十四年疏引漢書律麻志。載劉歆三統之術。以爲五月二十二分月之二十乃爲一交。交在望前。朔則日食。望則月食。交在望後。望則月食。後月朔則日食。交正在朔則日食。既前後望不食。交正在望則月食。旣前後朔不食。其文如此。而今律麻志並無此文。不知何時逸去。

### 漢無禮樂

禮樂志本當禮詳樂略。今乃禮略樂詳。全篇共分兩大截。後一截論樂之文。較之前論禮。其詳幾三倍之。而究之於樂亦不過詳載郊廟歌詩。無預樂事。蓋漢實無所爲禮樂。故兩截之首。各用泛論義理。全掇樂記之文。入漢事則云。漢興撥亂反正。日不暇給。以下敍叔孫通制禮。絕未述禮儀若何。卽述賈誼、董仲舒、王吉、劉向四人論奏。而止敍通事結之云。通定儀法未備。而通終敍誼事結之云。誼草具其儀。大臣絳、灌

害之。其議遂寢。其下又云。武帝議立明堂制禮服。竇太后不說。其事又廢。敍仲舒畢。結之云。上方銳志武功。不暇留意禮文之事。敍王吉畢。結之云。上不納其言。吉以病去。敍劉向畢。結之云。帝下公卿議。會向病卒。營表未作。以上無非反覆明漢之未嘗制禮。無可志而已。故其下又結之云。今叔孫通所譏禮儀與律令同錄。減於理官。法家又復不傳。漢典寢而不箸。民臣莫有言者。又通沒之後。河間獻王采禮樂古事。稍稍增輯至五百餘篇。今學者不能昭見。但推士禮以及天子。說義又頗謬異。故君臣長幼交接之道。寢以不章。漢典不傳。河間所輯。又與漢無涉。故無可志也。樂志旣述高祖風起之詩。武帝所立樂府。造詩歌。末段乃言河間獻王獻雅樂。樂官存之以備數。然常御及郊廟皆非雅聲。又言漢郊廟詩歌。未有祖宗之事。八音調均。又不協於鐘律。而內有掖庭材人。外有上林樂府。皆以鄭聲施於朝廷。其下又敍成帝時王禹獻河間樂。平當議請修之。公卿以爲久遠難明。議復寢。又敍哀帝欲放鄭聲。然百姓漸漬日久。又不制雅樂。有以相變。吏民湛湎自若。末復總結之云。大漢繼周。久曠大儀。未有立禮成樂。此賈誼、仲舒、王吉、劉向之徒所爲發憤而增嘆也。足明此志總見漢實。無所爲禮樂實無可志。

子長禮樂二書亦空論其理。但子長述黃帝及太初。若欲實敍。實難櫟括。孟堅述西漢二百年。何難實敍。祇因漢未嘗制禮樂。府俱是鄭聲。本無可志。不得已只可以空論了之。

此何用重出徒煩紙墨實屬冗複宜撮舉大意數言已足又載劉向議禮事約三百字則向傳所無濟濟通

王吉上疏驅一世之民濟之仁壽之城濟字本傳同詩朝濟于西又南山朝濟濟與濟通也監版志傳並改爲躋此俗儒所改躋字說文無之

### 有稅有賦

刑法志因井田而制軍賦有稅有租案下文卽云稅以足食賦以足兵師古曰稅田稅賦發斂財也則合作有稅有賦又食貨志前一段語意與此正同亦云有賦有稅若作租租卽稅也不可通矣

### 刑法志三非

刑法志大刑用甲兵其次用斧鉞云云語出魯語班氏據此故以戰守之兵與墨劓等刑合爲一志畢竟刑平時所用兵征討所用二者不可合班氏雖有此作後世諸史無從之者一非也於次宜先刑後兵今先兵後刑二非也漢家雖不制禮而未嘗無兵法一代之制豈無足述今先之以考古繼之以議論其下但云高祖定天下踵秦而置材官於郡國京師有南北軍之屯至武帝平百粵內增七校外有樓船皆歲時講肄述漢事只此數語毋乃太簡三非也惟其撮舉周禮井田軍賦大略最爲簡明說周禮者罕能及

### 肉刑

文帝除肉刑。當黥者髡鉗爲城旦春。當劓者笞三百。當斬左止者笞五百。當斬右止者皆棄市。有輕刑名實殺人笞五百三百。率多死。班氏論之云。除肉刑本欲全民。今去髡鉗一等。轉入大辟。以死罔民。死者歲萬數。刑重所致也。至穿窬之盜。忿怒傷人。男女淫佚。吏爲姦臧。若此之惡。髡鉗又不足以懲。刑者歲十萬數。民不畏又不恥。刑輕所生也。宜思清原正本。刪定律令。纂二百章。以應大辟。其餘罪次於古。當生今。觸死者。皆可募行肉刑。魏志陳羣議云。漢除肉刑而增加笞。本與仁惻而死更衆。所謂名輕實重也。名輕則易犯。實重則傷民。且殺人償死。合於古制。至於傷人。或殘毀其體。而裁翦毛髮。非其理也。若用古制。使淫者下於蠶室。盜者刖其足。永無淫放穿窬之患矣。夫三千之屬。雖未可卒復。若斯數者。時之所患。宜先施用。漢律所設殊死之罪。仁所不及也。其餘逮死者。可以刑殺。如此則所刑與所生。足以相質矣。今以笞死之法。易不殺之刑。是重人肢體。輕人軀命也。其旨本班氏。

賣弄

漢刑法志。廷平將招權。蘇林曰。招音翹舉也。猶賣弄也。後漢靈帝紀注。閔貢厲聲責張讓等賣弄國恩。又朱浮傳。浮爲大司空。坐賣弄國恩免。又楊震傳。震上疏言。親近侍臣賣弄威福。皆一意。若歐陽永叔得請歸田。寄友云也。賣弄得過裏。元人王實甫雜劇院本云。賣弄你有家私。此則指誇訛之義。今吳下里俗有此語。皆與宋元人語同。與兩漢人語異。

補漢兵志

補漢兵志一卷宋宗正少卿樂清錢文子文季刊門人奉議郎知江州瑞昌縣主管勸農營田公事陳元粹序近日盛百二李文藻刻之班氏於刑志中帶敍兵事草草數語全不詳備文子生千載之下亦不過從漢書中紳繹而得假令班氏欲志其詳何難委曲如繪惜乎略之唐兵制之善與漢同但其後內爲宦官所竊外爲方鎮所據初制固不然惜史亦略也宋廂軍禁軍何嘗不仿漢唐惟養兵冗濫漢唐所無耳文子考古以諷時有心哉

通鑑目錄第三卷漢滅項羽卽帝位定都雒陽下云兵皆罷歸家明季某公批云兵皆罷未妥觀後事可見漢此時新造而法制已定所云罷歸家非真廢兵不用京師南北軍固在也所罷惟郡國材官耳然以虎符召之卽立至特以漢人平日不養兵有事乃召事已卽罷某公竟認作真廢兵不用遂以其後反者數起事皆由罷兵所致不亦誤乎讀文子此編便自了然

宋史藝文志以此書編入類書一門真可發笑



# 十七史商榷卷十二

## 書六

米價

食貨志。魏文侯臣李悝言。一夫治田百畝。歲收畝一石半。石錢三十。沈形謂一石當今二斗。又謂此錢乃景王大錢。其重半兩。當今制錢二枚。俱未詳。漢初米石五千。沈謂此莢錢也。視李悝時價十六七倍。此志下卷又云。漢興米至石萬錢。宣帝時穀石五錢。農人少利。沈云。五十字。若石止五錢。則不得但云少利矣。但元帝二年齊地饑。穀石三百餘。王莽時穀價翔貴。雒陽以東米石二千六國至莽米價略具此。但錢之制隨時而變。量又古今不同。且秦漢時以百二十斤爲石。乃權之名。非量之名。未可據以考今日之價。秦始皇本紀三十一。年米石千六百存參。

今以十升爲一斗。五斗爲一斛。二斛爲一石。每升重一斤四兩。每斗十二斤八兩。每斛六十二斤八兩。每石一百二十五斤。

飢

小飢收百石。中飢七十石。大飢三十石。何校飢俱改饑。蔡虛齋云。飢饑不同。穀不熟曰饑。人無食曰飢。亦可通用。但有饑饉無饑渴。

賈量董論食貨

食貨志載賈誼、鼂錯、董仲舒奏議。三人本傳俱不重出，足見禮志直因無可敍述，聊采論奏敷衍成篇。

常平倉

宣帝時大司農中丞耿壽昌白令邊郡皆築倉以穀賤時增其賈而糴以利農穀貴時減賈而糴名曰常平倉民便之。上迺下詔賜壽昌爵關內侯。元帝卽位天下大飢。在位諸儒多言常平倉可罷毋與民爭利。上從其議罷之。愚謂蕭望之傳望之當宣帝時已力言常平之非矣。後書劉般傳永平十一年帝欲置常平倉公卿議者多以爲便。般對以常平倉外有利民之名而內實侵刻百姓豪右因緣爲姦小民不能得其平置之不便。迺止。夫常平初制於民無不益於官則損中藏益蓋上下交利焉。惟商賈因上握其權穀價常平無所益耳。然而法立弊生。漢人已以與民爭利譏之。況人心日巧姦僞萬端猾吏貪胥上下其手乎。唐宋變爲社倉又名義倉一切利病詳見朱子文集馬氏通考休寧戴震東原作其師婺源江永慎修行狀曰先生家故貧其居鄉嘗援春秋傳豐年補敗之義語鄉之人於是相與共輸穀若干田設立義倉行之且三十年一鄉之民不知有饑自古積粟之法莫善於在民莫不善於在官使民自相補救卒無胥吏之擾此先生之善於爲鄉之人謀者戴說片言居要附記於此。

金錢布帛

食貨志上卷言食下卷言貨篇首云凡貨金錢布帛夏殷以前其詳靡記太公爲周立九府圜法師古曰周官太府玉府內府外府泉府天府職內職金職黃金方寸而重一斤錢圓兩方孟康曰外圜而內孔方也輕重以銖師古曰言黃金以斤爲名錢則以銖爲重也布帛廣二尺二寸爲幅長四丈爲匹故貨寶於金利於刀如淳曰名錢爲刀者以其利於民也流於泉如泉也布於布民間束於帛李奇曰據此則周人所用貨幣凡有四種卓文君白頭吟云男兒重意氣何用錢刀爲古人以錢刀連言者多矣二者誠爲一類但班氏旣分言之則爲二物亦猶布帛相近而布究非帛如淳注直以刀泉皆爲錢本一物以其利名刀以其行名泉非也今古錢存者有作刀形予猶曾見之刀蓋錢中之別矣或云布亦名錢者天官外府掌邦布之出入鄭康成注布泉也其藏曰泉其行曰布賈元帝時貢禹言鑄錢采銅民心動搖棄本逐末宜罷鑄錢毋復以爲幣租稅祿賜皆以布帛及穀使百姓壹意農桑議者以交易待錢布帛不可尺寸分裂禹議亦寢禹議雖不行然卽此可見古固有以布帛爲市者而布黃金方寸而重一斤者孫子算經卷上云黃金方寸重一斤白金方寸重一十四兩是也輕重以銖者錢最輕者一銖最重者十二銖也孫子算經卷上云稱之所起起於黍十黍爲一絫十絫爲一銖二十四銖爲一兩是也

管子國畜篇云先王以珠玉爲上幣黃金爲中幣刀布爲下幣所謂先王蓋指虞夏以來言黃金則似銀銅不數而史記平準書云虞夏之幣金爲三品或黃或白或赤或錢或布或刀或龜貝至秦幣爲二等黃金爲上幣銅錢爲下幣珠玉龜貝銀錫之屬爲器飾寶藏不爲幣然則虞夏之制金銀銅並用管子言未

可泥言布不言帛亦從可知。如班氏言周惟用金錢布帛則秦罷珠玉等不爲幣似亦因周之舊非秦所  
創但平準書省言布帛耳自此以後遂爲定制是也。師丹傳哀帝卽位有上書言古者以龜貝爲貨今以錢易之民以故貧宜改幣而黃金亦不爲幣若專用銀錢則直至明中葉始定蓋時勢古今異宜幣之以銀錢爲定固不可易矣。新唐書五十四  
銀之由必有時唯銀無益於人宋史一百七十四食貨志歲賦之物共二十七銀但居一此在唐宋則然

斂散卽常平

志引管仲之言曰歲有凶穰故穀有貴賤令有緩急故物有輕重李奇曰上令急於求米則民輕米緩於求米則民輕米民有餘則輕之故人君斂之民不足則重之故人君散之李奇曰民輕之時爲斂之重之時官爲散也贊曰易稱衰多益寡書云櫟遷有無周有泉府之官師古曰司徒舊官也掌市之征布斂貨之不贍者以其價買之而孟子亦非狗彘食人食不知斂鄭氏曰毫落也人誠死多可野有餓莩弗知發零落不知發倉廩貸之故管氏之輕重李悝之平糴弘羊均輸壽昌常平亦有從律案輕重斂散之法實出周禮古人作錢原爲此設以備荒耳便民交易猶其後也若專爲便民是先王驅民背本逐末非作錢之本意也狗彘食人食不知斂趙岐改爲檢解爲法度檢斂已非本義朱子直云制也古訓愈失矣如班氏讀乃知孟子所言與周禮管子相出入雖孟子未讀周禮又鄙管仲未必觀其書然亦可知發斂之說遠有所承前篇所述耿壽昌穀賤增賣而糴穀貴減賣而糴此正發斂之說也若弘羊均輸盡籠天下貨物貴賣賤買則真與民爭利矣班氏乃與管氏輕重壽昌常平並稱謬矣均輸以

鹽鐵爲本兼及百貨常平之法穀而已矣姦僞日滋至後世常平亦難行而補救之術幾窮。後書朱暉傳肅宗時尙書張林請復用武帝均輸法暉以爲不可李賢注云武帝作均輸法謂州郡所出租賦并雇運之直官總取之市其土地所出之物官自轉輸於京謂之均輸。

### 臧粟臧繩

輕重斂散以時則準平使萬室之邑必有萬鍾之臧臧繩千萬千室之邑必有千鍾之臧臧繩百萬案孟康曰六斛四斗爲鍾繩錢貫也下文算輶車賈人緝錢皆有差師古亦云緝謂錢貫也通典注云緝者絲也以貫錢一貫千錢出二十爲筭也詩云維絲伊緝宋人亦以千錢爲一貫竊謂同一錢貫而異其名當有大小之別緝既是千錢則一繩當爲百錢也計萬室之邑每室粟一鍾以李悝之言度之可備四五人一月之食每室錢千繩爲錢一萬可備糴穀種及買耒耜器械并餚饋之用曰必有者明其不可更少實欲其浮於此數也此萬鍾與臧繩皆人君所臧以贍民者萬鍾以備散臧繩以備斂也。

賈誼諫宜禁民盜鑄錢上收銅勿令布則采銅鑄作者反於耕田銅畢歸於上上挾銅積以御輕重錢輕則以術斂之重則以術散之與前減價糴增價糴及臧粟臧繩皆是一意。

賈山傳文帝除鑄錢令山諫以爲錢亡用器而可以易富貴富貴人主之操柄也令民爲之是與人主共操柄也其後復禁鑄錢。

錢制

古錢輕重以銖而國語周景王時患錢輕更鑄大錢唐固注云徑一寸二分重十二銖文曰大泉五十案此乃王莽所造據唐注則是莽錢皆如周景王制也而秦錢輕重亦同古者以二十四銖爲一兩此大錢重十二銖是爲半兩錢古錢莫重於此景工欲鑄此錢單穆公諫不聽卒鑄大錢文曰寶貨肉好皆有周郭韋昭注云肉錢形也好孔也據此則知景王以前錢皆無文肉好亦無周郭矣秦錢形質如周錢惟文異文曰半兩重如其文平準書索隱據顧氏引古今注云秦錢半兩徑一寸二分重十二銖與周景王同漢興以秦錢重難用更鑄莢錢如淳曰本有榆字此傳寫脫蓋復景王以前錢制矣通典注云莢錢重銖半重三銖徑五分文曰漢興又云高后所行五分錢卽莢錢也孝文五年爲錢益多而輕更鑄四銖錢其文爲半兩後四十餘年武帝更鑄三銖錢明年又鑄五銖錢五銖得中道天下便之故王莽紛更錢制天下大亂而世祖受命盪滌煩苛復五銖錢亦見後馬援傳五銖之制唐宋以下蓋悉用之矣東吳顧氏云五銖錢十枚當今之一兩弱竊謂今以十錢爲一兩如顧氏說則今錢卽五銖錢也卽有不同大約輕重不甚相遠但彼一面文一面漫今則兩面有字式旣周正文又明析自三代秦漢以下錢制莫善於此

漢時錢稍重姦民盜摩錢質取鉛鉛銅屑也其下文有司請周郭其質令不得摩鉛誤作鉛文獻通考引之又誤作鑠人心日巧姦僞愈滋近年民間多剪取錢邊錢日壞嚴禁之始戢至盜鑄之犯者至死而猶不免要之有犯必懲則自不能

爲害惟私銷之害覺察最難尤宜加意大約銅賤錢貴則私鑄銅貴錢賤則私銷兩平則剪取錢邊故卽私鑄私銷之弊已絕猶必嚴濫惡小錢之禁俾其輕重一以五銖爲準

禁惡錢見舊唐  
宋璟傳

民間禁用銅器以鉛錫鐵代之凡銅器皆獻之官償其價而以鑄錢此法正賈誼所陳行之則官銅日裕

而私鑄私銷之弊亦絕乃法之最善者

顧氏曰明初鑄錢猶不用紀年自永樂以後專用紀年始爲常制

若干

凡數之不可知而約略舉之或其文太繁而撮舉之者曰若干今人猶然食貨志下篇輕錢百加若干應劭曰輕則以錢足之若干枚也師古曰若干且設數之言也千猶箇也謂當如此箇數百官公卿表下篇卷首標題師古注亦用此二字曲禮下篇問天子之年對曰始服衣若干尺矣疏云古謂數爲若干儀禮鄉射大射數射算云若干純若干奇若如也干求也事本不定當如此求之

張湯孔僅桑弘羊

桑、孔牟利微湯之深文巧法其策不能行也人知桑、孔小人而不知湯之贊畫居多告緝之比皆湯所定志中尤罪湯加桑、孔一等

食貨志校誤

食貨下卷。自武帝以前。皆取史記平準元文。但史記誤字脫字衍字甚多。皆當以食貨爲正。間亦有平準不誤而食貨誤者。如更令民鑄莢錢。當從平準。裴注作榆莢錢。已見前。公卿請令京師鑄官赤仄。當從平準作鍾官赤側。側仄字通。而鍾官者。卽下文禁郡國無鑄錢專令上林三官鑄。裴駟注云。漢百官表。水衡都尉。武帝元鼎二年置。掌上林苑屬官。有上林均輪鍾官辨銅令。上林三官其是乎。是也。益廣開置左右輔。當從平準作廣關。不敢言輕賦法。當從平準徐廣注作經賦。二條已見何氏讀書記。

# 十七史商榷卷十三

## 漢書七

最後

郊祀志自騶子論五德終始而宋毋忌、正伯僑、元尙、羨門高最後師古曰自宋毋忌至最後皆其人姓名凡五人案服虔及司馬貞說最後者自是謂其在騶子之後耳非姓名其實止四人顏注謬妄至此

### 木寓

木寓龍一駟李奇曰寓寄也寄生龍形於木也顧氏云古文偶寓通用木寓木偶也史記武紀作木偶馬李奇注非案封禪書此文之上敍秦事有木偶龍木偶車馬索隱亦以偶音偶謂偶其形於木此志之下文又有寓車一乘寓馬四匹又有以木寓馬代駒又有寓龍馬顧說是後書劉表傳論言表猶木偶之於人李賢注如刻木爲人是與偶同矣而其下文又引李奇注自岐其說

### 文帝王制

封禪書文帝使博士諸生刺六經作王制謀議巡狩封禪事漢郊祀志同司馬貞索隱引劉向七錄云文帝所造書有本制兵制服制篇本制兵制服制篇者卽封禪書所謂王制也而非今禮記中所有王制盧

植妄以當之。彼疏引鄭目錄云：名曰王制者，以其記先王班爵授祿祭祀養老之法度，此於別錄屬制度。又鄭答臨頤云：孟子當赧王之際，王制之作復在其後，然則康成之意不以王制爲文帝作明矣。覩文志，禮記百三十一篇，七十子後學者所記也。其後大小戴刪取之，今存四十九篇。王制在此內，與文帝所作何涉？許慎說文自序云：壁中書者，魯恭王壞孔子宅而得禮記、尙書、春秋、論語、孝經、禮記亦孔壁中所得，其非漢儒所作甚明。下文武帝得寶鼎，命羣儒采封禪，尙書、周官、王制事，此王制則是文帝所作，蓋文帝原爲封禪作之。武帝亦以議封禪采之也。

寬舒

使黃、錘史寬舒受其方。孟康曰：二人皆方士。案史記封禪書徐廣注云：錘縣黃縣皆在東萊。此說得之。黃、錘之史，其名寬舒。觀下文寬舒凡五見，而絕不見所爲黃錘者。孟康說謬甚。

泰一字衍

祠泰一於忌泰一壇旁。上泰一兩字衍。史記封禪書及武紀並無忌泰一壇者。毫人謬忌奏祠泰一方所作壇也。上文已言後有人上書言祠三一，今祠於忌泰一壇上。此則後人復有言祠黃帝等方，故又祠於壇旁也。

益延壽

甘泉則作益壽延壽館。師古曰：益壽、延壽二館名。案黃長睿云：史記作益延壽館。而近歲雍、耀間耕夫有

得古瓦其首作益延壽三字瓦徑尺字畫奇古卽此館當時瓦也又括地志云延壽觀在雍州雲陽縣西北八十一里通天臺西八十步正今耀州地也然則當以史記爲正漢郊祀志誤衍一壽字耳師古云二館非也

泰山明堂

武帝封泰山泰山東北阤古時有明堂處案孟子齊宣王問曰人皆謂我毀明堂趙岐注泰山下明堂周天子東巡狩朝諸侯之處齊侵地而得有之是也

貢韋匡谷

漢人郊祀瀆亂無理幾同兒戲元帝好儒貢禹韋玄成匡衡等相繼爲公卿禹建言漢家宗廟祭祀多不應古禮上是其言後玄成爲丞相議罷郡國廟自太上皇孝惠帝諸園寢廟皆罷成帝卽位丞相匡衡御史大夫張譚又奏言武帝所立郊祀與古制殊罷甘泉泰畤河東后土祠定南北郊於長安衡又請罷紫壇僞飾女樂鸞路駢駒龍馬石壇之屬及雍鄜密上下畤北畤陳寶祠一切淫祀皆罷成帝末年谷永說上曰明於天地之性不可惑以神怪知萬物之情不可罔以非類云云班氏贊云究觀方士祠官之變谷永之言不亦正乎愚謂韋、匡庸相也貢、谷陋儒也然郊祀賴其駢奏古制獲存是其所長至鄭康成注禮皆據經典而趙宋以後妄徒動輒詆其用漢制解經有識者毋惑也

越絕書卷二吳地傳高皇帝封兄子濞爲吳王治廣陵并有吳立二十一年東渡之吳十日還去匠門外信士里東廣平地吳王濞時宗廟也太公高祖在西孝文在東去縣五里永光四年孝元帝時貢大夫請罷之郡國僭立之廟爲貢禹所奏罷而見於傳記者此其一也然元帝時濞之滅百餘年矣而廟始得罷貢禹正禮之功偉矣

三五

谷永論淫祀求僥之妄而曰周秦之末三五之隆已嘗專意求之曠日經年靡毫釐之驗師古云三謂三皇五謂五帝劉仲馮駁之以爲三五指三世五世謂文武劉說確甚漢興高帝一世惠帝二世文則三世武則五世也文帝雖令主公孫臣新垣平已爲文成五利導夫先路故約言之

天文志無注

天文志師古竟全卷無注其中譌字及與他書不同者頗多宜以史記及呂氏春秋淮南子甘石星經諸史天文志參訂之

星日月本在地

天文志常宿五星日月皆陰陽之精其本在地而上發於天語本史記疑七十子以來相傳微言說文卷七上晶部壘字注云萬物之精上爲列星與漢志合

二十八宿敍次

二十八宿敍次以東西南北中五宮爲綱而監版於南宮權軒轅一節提行另起既以五宮爲綱權字不當提行毛版是

喔

天喔而見景星又天喔晏喔說文卷七上夕部以喔爲姓雨而夜除星見也徐鉉曰今俗別作晴非是

九道九行

日有九道月有九行案洪範日月之行則有冬有夏鄭注四時之間合於黃道也詳後案

天文志所引

天文志引甘氏石氏經又引夏氏日月傳星傳不知夏氏何人又有但稱星傳不云某氏者賈孔諸經疏中每引武陵太守星傳疑卽其說五行志亦引星傳又引劉向所引星傳然則星傳乃漢初已有

五行志所引

五行志先引經曰一段是尙書洪範文次引傳曰一段是伏生洪範五行傳文又次引說曰一段是歐陽大、小夏侯等說乃當時列於學官博士所習者以下則歷引春秋及漢事以證之所采皆董仲舒劉向歆父子說也而歆說與傳說或不同志亦或舍傳說而從歆又采京房易傳亦甚多今所傳京氏易傳中皆

無之。則今所傳京氏易傳已非足本。間亦采眭孟、谷永、李尋之說。眭、谷語略皆見其傳中。尋說則傳無之也。

史記成公十六年公會諸侯於周云云。師古於史記下注云此志凡稱史記者皆謂司馬遷所譏也。愚謂師古注此書成年已六十一。六十五而卒。學識本不甚高。又已老悖。故舛謬頗多。此注以左氏爲司馬遷竟如不辨菽麥者。

### 王立

成帝河平二年夏帝舅五人封列侯。師古曰譚、商、立、根、逢時。凡五人。凌穉隆本立作音。沈炯云外戚恩澤侯表紅陽荒侯立與譚、商、根、逢時俱以河平二年六月乙亥封。五人皆皇太后弟安陽敬侯王音以皇后從弟大司馬車騎將軍侯其封在鴻嘉元年六月乙巳以立作音乃凌本之誤。又成紀亦作立與表同。而音之封不見於紀。史漏之也。

### 二志矛盾

五行志上卷末段以罷郡國廟及太上皇惠帝寢廟徙甘泉秦畤河東后土於長安南北郊。又罷雍五畤郡國諸舊祀皆致水災之應而不言其說出於何人。觀郊祀志劉向之言知其出於向也。夫毀廟徙郊等皆復古而得禮之正者。貢禹匡衡谷永說皆是也。而向乃以爲能致水災。向之曲說如此。班書采輯諸書

而成，有未加裁剪者。如郊祀志贊云：究觀方士祠官之變，谷永之言不亦正乎？是固以毀廟徙郊爲正也。而此志乃復云云殊自相矛盾矣。

### 鼠妖證青祥

貌傳自成公七年以下一段所引春秋三節漢事二節皆以鼠妖證青告青祥此不可解後思心傳中又以鼠妖證黃祥一事複出卷中如此甚多又隱公三年日食而以爲其後鄭獲魯隱注引狐壤之戰此自是隱爲公子時事洪邁譏之桓公三年日食而以爲楚嚴稱王兼地千里是其應不知楚自武王稱王歷文成穆至嚴已四世而嚴之霸去桓公三年將百年矣劉知幾譏之此等舛謬不可枚舉

### 吳二城門

吳王濞二城門自傾其一門名曰楚門一門曰魚門吳地以船爲家以魚爲食云云范成大吳郡志第三卷城郭篇閭門亦名破楚門而無所謂楚門魚門者要之二門必當在今蘇州府治吳長洲元和三縣地此志特因吳本屬吳國而濞又嘗東渡之吳留十日去故此下文遂以二門之傾爲濞亡之兆其實濞都廣陵不都吳若據此文誤認濞之所都卽今蘇州府治則非矣詳地理雜辨證

### 五行志引大傳

引書序及伏生大傳伊陟相太戊桑穀共生事其下又引劉向說以桑穀爲高宗武丁時事此向之誤而

班氏聊存異說耳。師古乃疑伏生差謬，殊憤憤。

雨魚信都

成帝鴻嘉四年秋雨魚于信都，長五寸以下。案荀悅漢紀作雨魚於新都，長五尺。新都見王莽傳，乃謂新野之都鄉。地理志本無此縣，辨詳後漢紀誤也。

七國秦無日食

五行志說春秋及漢興以來日食詳矣。七國及秦始皇、二世之時，生民之禍甚烈，宜日食不勝書，而志無之。史失其官，不可考耳。秦本紀、始皇本紀所書災祥甚多，而獨無日食。

# 十七史商榷卷十四

## 漢書八

### 地理論古

地理志敍首論古太繁。劉知幾譏之云：春秋賦詩見志，左氏惟錄章名。地理論古至夏世，宜曰禹貢已詳。何必重述古文，益其辭費？劉氏之說頗當。而師古又從而勦襲，僞孔傳以爲注，更覺饒舌可厭。孔傳所無者，又取本志注之，更爲可笑。況又強作解事，如沂出泰山郡，蓋縣臨樂山，今乃截取之云沂出泰山，此成何語。

### 十三部

冀、兗、青、徐、揚、荆、豫、梁、雍、幽、并、營。此唐虞之十二州也。漢無營州，其十一州皆有之。但改梁名益，改雍名涼，而又南置交趾，北置朔方之州，凡十三部。部刺史員十三人。此見於地理志、百官表及師古所引胡廣記者也。據文似十一州外添交州，朔方爲十三部矣。但河內、河南二郡注云屬司隸，而各郡國無屬朔方者。百官表司隸校尉武帝征和四年置，察三輔、三河、弘農三輔是京兆、馮翊、扶風三河是河內、河南、河東續郡國志，此六郡與弘農正屬司隸。東漢如此，西漢可知。杜佑通典於西漢十三部亦不數朔方而數司隸。

且地理志敍首雖云置朔方之州而朔方刺史果亦在員數之內則朔方郡宜專屬之矣今乃注云屬并州則知所謂十三部者實是於舊十一州外添交州與司隸爲十三朔方不數平當傳當以丞相司直坐法左遷朔方刺史師古曰武帝初置朔方郡別令刺史監之不在十三州之限是也惟晉書地理志述漢制數朔方爲十三督

書此段謬誤甚多不可據

刺史察藩國

百官表部刺史奉詔條察州師古引漢官儀惟一條察強宗豪右其五條皆察二千石師古引漢官儀亦見續百官志劉昭而歷攷諸傳中凡居此官者大率皆以督察藩國爲事如高五王傳青州刺史奏蓄川王終古罪文三王傳冀州刺史林奏代王年罪武五子傳青州刺史雋不疑知齊孝王孫劉澤等反謀收捕澤以聞亦見傳又昌邑哀王之子賀旣廢爲宣帝所忌後復徙封豫章爲海昏侯揚州刺史柯奏其罪張敞傳拜冀州刺史旣到部而廣川王國羣輩不道賊發不得敵圍王宮搜得之捕格斷頭縣王宮門外因劾奏廣川王削其戶蓋自賈誼在文帝時已慮諸國難制吳楚反後防禁益嚴部刺史總率一州故以此爲要務

後書郅惲傳惲子壽爲冀州刺史時冀部屬郡多封諸王賓客放縱壽案察之無所容貸迺使部從事專住王國又徒督郵舍王宮外動靜失得卽時騎驛言上奏王罪及劾傅相袁宏後漢紀第十六卷永寧元年立濟北王子萇爲樂城王萇驕淫失度冀州刺史舉奏萇罪至不道然則刺史以察藩國爲事東京猶

然

### 刺史權重秩卑

刺史初不常置。武帝元封五年始常置。官表其權甚重而秩則卑。蓋所統轄者一州。其中郡國甚多。守相二千石皆其屬官。得舉劾。而秩僅六百石。治狀卓異。始得擢守相。如魏相傳。相爲揚州刺史。攷案郡國守相多所貶退。居部二歲。徵爲諫大夫。復爲河南太守。何武傳。武爲刺史。所舉奏二千石長吏。必先露章。服罪者虧除免之。不服極法奏之。抵罪或至死。而王嘉傳云。司隸部刺史察過悉劾二千石益輕。或持其微過言於刺史司隸。衆庶知其易危。小失意則離畔。以守相威權素奪也。京房傳。房奏考功課吏法。時部刺史奏事京師。上召見諸刺史。令房曉以課事。刺史以爲不可行。房上弟子曉考功法。石顯疾房欲遠之。建言宜試以房爲郡守。元帝於是以房爲魏郡太守。得以考功法治郡。房自請願無屬刺史。可見守相畏刺史如此。又朱博傳。爲冀州刺史。行部。吏民數百人遮道自言。博使從事敕告吏民。欲言縣丞尉者。刺史不察。黃綬各自詣郡。欲言二千石墨綬長吏者。使者行部還詣治所。師古曰丞尉職卑。皆黃綬治所。刺史所止理事處。所彈劾者如是。而所舉薦者。則如王襄傳。王襄爲益州刺史。使襄作中和樂職。宣布詩奏。襄有軼才。王莽傳。莽風公卿奏言。州部所舉茂才異等吏。率多不稱。此雖莽欲攬威柄。故云爾。要刺史有舉揚人才之任。亦可見合而觀之。刺史之權可謂重矣。及其遷擢也。黃霸爲揚州刺史。

以高第爲潁川太守。見循吏傳陳咸由部刺史歷楚國、北海、東郡太守。見程方進傳張敞爲冀州刺史，盜賊禁止。太原太守滿歲爲真。見本傳王尊爲徐州刺史，遷東郡太守。見本傳馬宮由青州刺史爲汝南九江太守。見本傳知其秩卑也。

馮奉世傳子參由渭陵寢中郎超遷代郡太守。中郎出爲太守云超遷，而刺史則多有以卑秩得之者，故京房請以中郎補是職也。又如孔光傳云：博士選高第爲尚書，次乃爲刺史，而滿宣由謁者出爲冀州刺史。見賈捐之傳張敞由太僕丞出爲豫州刺史。見本傳皆以朝臣之卑者充之。其歲盡輒奏事京師。見程方進傳注九歲稱職，方得爲守相。見朱博傳其內遷則如翟方進、何武僅得爲丞相司直，特丞相之門下屬官耳。各見本傳著王尊爲郿令遷益州刺史。見本傳令可以徑遷刺史，亦由秩卑故也。

### 刺史隸御史中丞

刺史權重矣，而又內隸於御史中丞，使內外相維。陳萬年傳子咸爲御史中丞，總領州郡奏事課第諸刺史。薛宣傳爲御史中丞，執法殿中外，總部刺史，上疏曰：聖化不洽，吏多苛政，大率咎在部刺史。宣數言政事便宜，舉奏部刺史郡國二千石所貶退稱進，白黑分明，是也。續百官志云：御史中丞一人，劉昭注引蔡質漢儀云：丞故二千石爲之。或選侍御史高第執憲中司，朝會獨坐，內掌蘭臺，督諸州刺史。又後書酷吏周糾傳注引漢官儀曰：御史中丞外督部刺史，內領侍御史，糾察百司。

## 郡國官簡

十三部分爲郡國一百三其屬縣有蠻夷者曰道公主所食曰邑侯所封爲侯國每部有刺史每郡有太守守之下則都尉與丞諸王初以內史治民中尉掌武職相統衆官後省內史令相治民如郡太守中尉傳武與莽爲驍大如郡都尉此成帝時制見百官表而何武於哀帝時奏中尉官罷職并內史見本約元始仍後舊制每縣有令小縣稱長令長之下有丞尉漢官員數據表有十二萬二百八十五人而郡國官其簡如此至於令史掾屬多有通經術至卿相者而十里一亭亭有長十亭一鄉鄉有三老掌教化嗚夫聽訟收賦稅游徼循禁賊盜其非長吏而代長吏治民者又未嘗概從簡省也蓋其時風氣猶樸故能成治若後世之吏員其中固無人才而所謂里長保正總甲牌頭者又烏可多設乎官工官服官發弩官雲夢官樓船官陂官湖官均輸官銅官金官木官橋官牧師官園蓋官淮浦官蓋官之類皆微末下吏蓋不足道且多隨時隨地設立事過輒罷不常置者其正官則郡刺史太守縣令都尉委尉外別無他官漢郡國官制可謂簡矣

## 漢制依秦而變

續百官志云漢之初興法度草創略依秦制雖依秦亦遞變之秦分天下爲三十六郡以郡領縣無冀兗等州名有監御史有守有尉有令有丞見史記秦始皇本紀又曹參傳擊胡陵方與攻秦監公軍破之東下薛擊泗水守軍薛郭西孟康曰監御史監郡者晉灼曰秦一郡置守尉監三人蕭何傳注蘇林亦曰秦時無刺史以御史監郡高本紀秦二年沛公守豐秦泗川監平將兵圍豐與戰破之文穎曰泗川今沛郡

也。高祖更名沛。秦時御史監郡。若今刺史。其下又云沛公引兵之薛。秦泗川守壯兵敗於薛。如淳曰。秦并天下爲三十六郡。置守、尉、監。又李斯上書請天下有藏詩書百家語者。詣守、尉燒之。合觀之。秦制可見。監既在守之上。則似漢之部刺史。但每郡皆有一監。則又非部刺史比矣。蓋秦懲周封建流弊。變爲郡縣。惟恐其權太重。故每郡但置一監一守一尉。而此上別無統治之者。

夏侯嬰傳亦云。攻胡陵。嬰與蕭何降泗水監。平以胡陵降。樊噲傳亦云。擊泗水監豐下。破泗水守薛西。此與曹參傳、高本紀所述皆一事。

嚴助傳。秦時使尉屠睢擊越。使監祿鑿渠通道。張晏曰。郡都尉姓屠名睢。監郡御史名祿。陳涉傳。攻陳。陳守令皆不在。獨守丞與戰譙門中。攷秦三十六郡中無陳郡。陳是縣名。而爲太守治所。故云守令皆不在。每縣令之外有丞。守丞必陳縣之丞代令守城者。又張耳陳餘傳。耳說趙豪桀曰。陳王奮臂。天下莫不應。縣殺其令丞。郡殺其守尉。叔孫通傳。通對二世曰。羣盜鼠竊狗盜郡守、尉令捕誅。何足憂。彙而攷之。秦制已明。而漢制則仍秦而遞變者。

秦監郡御史亦名郡長。灌嬰傳云。轉南破薛郡長。師古曰。長亦如郡守也。時每郡置長。又云破吳郡長。吳下得吳守。如淳曰。長。雄長之長也。師古曰。此說非也。吳郡長當時爲吳郡長。嬰破之於吳下。愚謂此所謂郡長。必卽監郡御史。師古兩注皆未明。

南粵王趙佗傳敍元鼎六年平南粵事有粵桂林監居翁服虔曰桂林部監也姓居名翁案每部設監此秦制也漢改部刺史則監罷不設矣佗本秦吏故南粵尚用秦制郡有監此桂林卽秦時所置郡也服注非

三國魏志夏侯玄傳玄議時事云秦不師聖道姦以待下懼宰官之不修立監牧以董之畏督監之容曲設司察以糾之宰牧相累監察相司人懷異心上下殊務漢承其緒莫能匡改觀此知漢制因秦也宰官卽縣令監牧卽郡守司察卽監郡御史玄又謂五等之典雖難卒復可竊立儀準今長吏皆君吏民橫重以郡守累以刺史若郡所攝唯在大較則與州同無爲再重宜省郡守但任刺史

### 刺史太守屢更

刺史太守漢制屢有改更朱博傳翟方進奏古選諸侯賢者爲州伯書曰咨十有二牧也今部刺史居牧伯之位秉一州之統選第大吏所薦位高至九卿所惡立退任重職大春秋之義用貴治賤不以卑臨尊刺史位下大夫而臨二千石輕重不相準失位次之序請罷刺史更置州牧博奏漢家置郡縣部刺史奉使典州督察郡國吏民安寧故事居部九歲舉爲守相其有異材功效著者輒登擢秩卑而賞厚咸勸功樂進丞相方進奏罷刺史更置州牧秩真二千石位次九卿九卿缺以高弟補其中材則苟自守而已恐功效陵夷姦軌不禁臣請罷州牧置刺史如故奏可愚考因方進奏改刺史爲州牧由六百石進二千石

事在成帝時。先時刺史擢太守。此時則太守擢乃得牧矣。所以方進之子義由弘農太守、河南太守乃得爲青州牧也。此制行未久。哀帝時爲朱博奏。仍復舊制。至元壽復改爲州牧。王莽變革。光武建武元年。復置牧。十八年。又改刺史。若漢末袁紹、曹操輩爲州牧。位尊權重。與西漢初制迥不相同。魏志劉馥等傳評曰：自漢季以來，刺史總統諸郡賦政於外，非若曩時司察之而已。至唐而刺史之名。又移之太守矣。

### 太守別稱

鼂錯傳稱郡守爲主郡吏。嚴助傳助爲會稽太守。帝賜書謂之郡吏。而尹翁歸傳拜東海太守。過辭廷尉于定國。定國家在東海。謂其邑子曰：此賢將孫寶傳。寶爲京兆尹。吏侯文亦稱寶爲將。又酷吏傳。嚴延年爲涿郡太守。掾蠡吾趙繡稱延年爲新將。注新爲郡將也。謂守爲將。以其兼領武事。此皆太守之別稱也。至後漢亦有此稱。如後書馬援傳。援戒兄子嚴敦書。杜季良豪俠。郡將下車輒切齒。吾常爲寒心。又魯恭傳。恭弟丕爲郡督郵功曹。所事之將無不師友待之。鄭均傳。不應州郡辟召。郡將欲必致之。第五倫傳。會稽俗多淫祀。前後郡將莫能禁。此皆謂太守爲將也。又循吏童恢傳。恢弟翊。辟孝廉除須昌長。聞舉將喪。棄官歸。舉將當是郡守之曾舉翊者。

### 守尉改名

百官表。郡守秦官掌治其郡。景帝中二年更名太守。郡尉秦官掌佐守典武職。甲卒。景帝中二年更名都

尉而史文閒有追稱之者如樊噲傳云攻南郡尉東郡守尉於成武劉攽云圉縣名有尉無都尉又郡都尉景帝方置明此衍都字愚謂都尉在圉即可稱圉都尉劉以爲縣尉太卑未必能守城恐劉亦誤但秦本無都尉名郡都尉與縣尉同稱尉漢之改名當亦爲其易溷今此上言圉都尉必是追稱而下言守尉則是都尉代守郡者耳知者高紀秦三年攻東郡尉於成武彼與樊噲傳同述一事彼孟康曰尉郡都尉也師古曰本謂之郡尉至景帝時乃改曰都尉據此知樊噲傳云守尉是都尉代守守史記南越尉佗傳二世時南海尉任囂病且死召龍川令云云徐廣注云爾時未言都尉也周勃傳免相就國每河東守尉行縣至絳勃被甲持兵以見考此當文帝時尙未改名



# 十七史商榷卷十五

## 漢書九

### 侯王相有別

諸郡國下所屬縣有注侯國者，卽所謂王子侯、恩澤侯等侯國也。王子侯表所載，而地理志於其縣下不注者，如丹陽郡之胡孰、秣陵、丹陽之類，此因元始時其國已除故也。儒林傳云：郡國縣邑有好文學，敬長上肅政教，順鄉里，出入不悖，所聞者令相長丞上所屬二千石，二千石謹察可者，常與計偕，詣太常受業，如弟子師古曰：令、縣令、相、侯相、長、縣長、丞、縣丞也。二千石謂郡守及諸王相也。此注甚分明。大縣稱令，小縣稱長。侯國之相如令長，王之相如太守，同名而實異。王莽傳：莽出就新都侯國，南陽太守選掾宛孔休爲新都相。此侯國相，故太守得選掾爲之，然亦必權攝，非真也。

### 令長守相有高下

馮野王傳：補當陽長，遷爲櫟陽令，徙夏陽令。孔光傳：宣帝時，諸侯王相在郡守上，然則令長守相雖相等，而其中又自有高下。長遷乃得令，守遷乃得相也。

### 郡國兵權

百官表雖言守治郡尉典武職而實守兼掌之。韓延壽爲潁川太守傳中述其都試講武甚備。翟義爲東郡太守以九月都試日勒車騎材官士起事。如淳曰：太守、都尉、令、長、丞、尉會都試，課殿最也。後書耿弇傳弇見郡尉試騎士建旗鼓，隸馳射。由是好將帥之事。注引漢官儀曰：歲終郡試之時，講武勒兵，因以校獵，簡其材力也。弇事雖當王莽時，其實沿漢舊制。故注引漢官儀以明之。又後書百官志五，李賢注引漢官儀云：八月太守、都尉、令、長相丞、尉會都試，課殿最。水家爲樓船，亦習戰射行船。邊郡太守各將萬騎，行鄣塞烽火追虜。或言八月或九月或歲終大約總在秋冬。淮南王安傳，安欲發兵反，先令人作旁近郡太守、都尉印，可見守尉互掌兵權也。又安與太子反，謀聞，上遣廷尉監與淮南中尉逮捕太子。王與太子謀召相二千石，欲殺而發兵，召相至內史以出爲解。中尉曰：臣受詔使不得見王。王念獨殺相而內史、中尉不來，無益也。卽罷相，觀此知諸侯王國中兵權相與內史、中尉兼掌之，互相牽制，三者有一不肯，卽不能發兵。

王自除丞尉

衡山王賜傳如淳注引漢儀注，吏四百石以下諸侯王得自除國中百官表云：縣丞、尉四百石至二百石。漢儀注所言指丞、尉也。賈誼傳言諸侯王不法事云：彼自丞、尉以上，偏置私人，如此則非制矣。

監刺史從事

蕭何傳。何沛人爲沛主吏掾。秦御史監郡者與從事辨之。何乃給泗水卒史。攷沛郡注云。故秦泗水郡。沛是泗水屬縣。何爲監郡御史從事能辦治。故進爲郡卒史。王尊傳。爲郡決曹史。舉幽州御史從事。如淳曰。漢儀注。刺史得擇所部二千石卒史與從事。監與刺史大略相似。故擇用所部卒史。從事同。朱博傳。敕告民爲吏所冤。及言盜賊辭訟事。各使屬其部從事。刺史從事之權如此。

### 郡不言何屬

地理志。郡國一百三。言所屬者凡七十九。不言所屬者凡二十四。詳攷之。其不言者。皆疏漏。非有義例也。即如臨淮郡不言何屬。而其上文琅邪、東海二郡皆云屬徐州。臨淮之屬徐州無疑。而獨不言。泗水國不言何屬。而其上文楚國、下文廣陵國皆云屬徐州。泗水之屬徐州無疑。而獨不言。九真郡不言何屬。而其上文南海、鬱林、蒼梧、交趾、合浦。其下文日南六郡皆云屬交州。九真之屬交州無疑。而獨不言。即此三處推之。則其餘郡國之不言者。皆疏漏可知。且其所屬。有屬冀州。屬兗州。屬青州。屬徐州。屬揚州。屬荊州。屬豫州。屬幽州。屬并州。屬益州。屬交州。屬司隸。而獨無雍州改名之涼州。亦皆疏漏耳。百官公卿表明言部刺史奉詔察州員十三人。地理志明言漢兼禹貢、職方州名。有徐、梁、幽、并。改涼、益。增交趾、朔方爲十三部。平紀。元始元年。置大司農部丞十三人。人部一州。勸農桑。若涼州不爲部。則僅十二人矣。足明郡國之無屬涼州者。乃疏漏也。自武都以下至北地。凡十郡。皆不言何屬。據續志內。惟天水東漢改名漢陽。而皆屬

涼州東漢如此西漢可知班不言非疏漏而何又據百官表及續志司隸所屬有七郡今獨河內河南言  
屬司隸餘皆不言亦疏漏也續郡國逐州分敍界盡井然似反勝於前志

元始戶口

每郡首列戶口之數而於京兆尹冠以元始二年師古曰漢戶口元始最盛故舉之以爲數愚謂元始半  
帝號是歲壬戌王莽秉政戶口之盛必多增飾班氏豈不知之蓋取最後之籍以爲定不必以其盛也  
但有合郡戶口數每縣下無之而京兆尹長安縣左馮翊長陵縣右扶風茂陵縣潁川郡陽翟縣僞陵縣  
並有戶口河南郡雒陽縣南陽郡宛縣蜀郡成都縣魯國魯縣楚國彭城縣有戶無口其詳略皆無義例  
有則書之無則闕各縣戶口皆注於其縣之下獨雒陽注於郡名下書法參差亦無義例

郡國屬縣之數

周勃傳勃東定楚地泗水東海郡凡得二十二縣泗水郡卽沛郡也今地志沛東海二郡共有七十五縣  
蓋元始時漢新置之縣比秦已多再倍有餘又云降太原六城今地志太原凡二十一縣亦比秦多再倍  
高紀六年以太原郡三十一縣爲韓國徙韓王信都晉陽高祖之六年在周勃降太原之後而其數與勃傳及地志皆不同又云定雁門郡十七縣雲中郡十二  
縣今地志雁門十四縣比舊反少三縣雲中十一縣比舊反少一縣又云定代郡九縣今地志代郡十八  
縣則比舊多其半又云定上谷十二縣右北平十六縣遼東二十九縣漁陽二十二縣今地志上谷十五

縣比舊多三縣。右北平十六縣數適相符。而遼東祇有十八縣。漁陽祇有十二縣。比舊反少甚多。高紀十年。趙相周昌奏常山有二十五城。地理志常山屬縣僅十八。比舊反少七縣。斬欽傳降邯鄲郡六縣。今地志趙國即秦邯鄲郡屬縣僅四。比舊反少二縣。其分割之詳不可攷矣。

### 建置從略

地理建置沿革無常。以最後爲定。戶口據元始。疆域當亦據元始也。攷文三王傳。梁孝王國四十餘城。孝王卒。景帝中六年分爲五國。四人別爲濟川、山陽、濟東、濟陰四國。而太子共王買仍封梁共王子平王襄。以罪削五縣。餘尚有八城。此武帝時事。當武帝未削之。梁國得初封五之一。屬縣有十三。今志於彼四國則有山陽郡、濟陰郡。皆卽景帝故國。東平國即濟東國。獨不見濟川國。惟此一國疆域竟無所見。已屬缺漏。史記世家。梁孝王子明孝景中六年爲濟川郡。今志無濟川郡。又志濟陰屬縣九。東平屬縣七。皆與梁國略相等。獨山陽屬縣多至二十三。決不此國獨多如此。然則山陽郡下本注雖言景帝中六年爲國。武帝建元五年爲郡。其實郡界非國舊界。大約別割他地益之。或卽將濟川一國併入。未可知。且以四十餘城分爲五計之。十三也。九也。七也。三國已得二十九。加山陽二十三。四國已得五十二。尙有濟川不在內。數大不符。可見山陽郡界非國界。文三王傳。山陽王景中六年立。立九年國除。適當建元五年。此志與傳合。獨屬縣非國之舊。而班略之。此皆分割大事。班氏概略之。竊謂史法貴簡。獨建置沿革乃地理之至要。宜條析而詳書之。

詞繁而不殺爲佳。無如志之一體班氏所剏風氣初開義例疏闊不能詳析也。凡如此類不可枚舉舉一以資隅反。

分割雖據元始又有不拘者文三王傳清河王年當地節中已國除元始二年立年弟子如意爲廣宗王亦見諸侯王表廣宗是元始所建國志中略不載則是又不據元始矣例俱不定。

傳言梁國削餘八城志梁國所屬恰八縣若據此則是梁孝王之孫平王襄當武帝時削五縣餘尚有八縣直傳至元始時尙是武帝時之故疆矣而今攷之則不然襄立四十年薨其下傳五世至名立者嗣立爲王當成帝元延中又坐罪削五縣則餘只有三縣矣至元始中立又坐廢爲庶人自殺國除後二歲莽白太皇太后立孝王玄孫之曾孫音爲梁王奉孝王後莽篡國絕志據元始梁國當三縣而列八縣何也足見班氏於建置從略又如志列淮陽國而此國屢爲郡屢爲縣注絕不及已詳後淮陽郡汲黯傳云云一條而梁平王襄傳元朔中睢陽人犴反人辱其父而與睢陽太守客俱出同車犴反殺其仇車上亡去睢陽太守怒以讓梁二千石求反急睢陽是梁國屬縣縣不當稱太守史記世家述此事作淮陽太守彼是也漢書誤作睢陽太守耳然武帝時制王國有內史治民中尉掌武皆二千石若太守則治郡者王國無之可知武帝時淮陽爲郡不爲國而志不及建置之略如此犴反史記作類犴反索隱云人姓名恐當從漢書

武五子燕刺王旦傳武帝末年坐罪削良鄉安次文安三縣其後昭帝時又益封三千萬戶其下文即云

發民大猶文安縣則昭帝時益封已還其所削縣矣其後謀反發覺自殺國除今地志大字無燕國而安次文安則屬勃海郡良鄉則屬涿郡可見燕國除後其縣入此二郡而二郡注皆云高帝置不知幾經分割後尚是高帝之舊乎必不同矣且燕地必更有入漁陽右北平等郡者不止二郡今皆不可攷又旦傳宣帝又封旦太子建爲廣陽王傳至莽不絕志有廣陽國注云高帝燕國昭帝元鳳元年爲廣陽郡宣帝本始元年更爲國屬縣只四縣首縣薊下注云故燕國召公所封旦令羣臣亦曰燕雖小召公建國則薊必是旦所都元鳳之廣陽郡卽燕國除爲之及更爲國嫌太大故又割入勃海等郡僅存四縣也班於建置沿革太略然此等分割糾紛若必逐縣詳注又嫌繁瑣則似亦有不得不如此從略者

志山陽郡注云故梁景帝中六年別爲山陽國武帝建元五年別爲郡其屬首縣昌邑注云武帝天漢四年更山陽爲昌邑國武五子傳云昌邑哀王轉天漢四年立薨子賀嗣昭帝崩徵賀立之淫亂廢歸國賜湯沐邑國除爲山陽郡惟此一郡由國而郡由郡而國由國而復爲郡最爲詳析合志傳觀之首末具見他郡國皆不能如此



# 十七史商榷卷十六

## 漢書十

### 刺史治所

續漢百官志云刺史各主一州常以八月巡行所部郡國錄囚徒考殿最既以八月出巡則平日必有治所乃劉昭注則云孝武始制刺史監糾非法傳車周流匪有定鎮昭說未的而閻氏若璩遂云通鑑齊孝王孫謀發兵臨淄殺青州刺史此刺史適在臨淄非必治所胡三省乃云臨淄青州刺史治豈知西漢刺史稱傳車居無常處者乎閻雖云爾而刺史治所明見朱博傳又武紀元封五年初置刺史部十三州師古注引漢舊儀云初分十三州假刺史印綬有常治所閻似失考但地理志於刺史所治之縣竟未一及耳

三國魏志夏侯玄傳玄議時事司馬宣王報書云故刺史稱傳車其吏言從事居無常治又唐六典第三十卷云武帝元光三年初置部刺史十三人居無常所後漢則皆有定所此閻說所本然朱博非前漢乎大約因其乘傳周行故隨便言之

### 太守治所

太守都尉皆當有治所今都尉治所夾注中甚多而太守治所竟絕不一及何也夫都尉治所大率不在首縣且與太守不同治是以注明乃太守治所亦不盡在首縣而竟絕不一及則疏矣

續書郡國志劉昭注引潘岳關中記云三輔舊治長安城中長吏各在其縣治民光武東都之後扶風出治槐里馮翊出治高陵今前志於高陵注云左輔都尉治蓋京城只長安一縣三輔共治之左馮翊亦治長安故高陵得爲都尉治都尉不與太守同治也

閻若璩云郡國志凡縣名先書郡所治此惟東漢則然西漢不爾歷考志傳以證之爲治者二十有六江陵也平襄也宛也翟也薊也彭城也邯鄲也臨淄也雒陽也廣陵也昌邑也吳也壽春也鄴也相也成都也長子也濮陽也無鹽也魯也江州也涿也僰道也故苴蘭也邛都也滇池也不爲治者三梁國首陽卻不爲治治睢陽王國以內史治民而梁孝王武傳梁內史韓安國從王於睢陽也汝南郡首平輿亦不爲治治上蔡以翟方進傳知之左馮翊首高陵亦不爲治治長安以趙廣漢傳景帝紀注及百官表知之而韓延壽傳云延壽爲左馮翊出行縣至高陵尤明證也胡三省注通鑑地理號佳者亦不知西漢第一縣非必郡治如云班志襄平縣遼東郡治所猶可而云漢中郡治西城縣豈可乎又云漢五原郡治畨陽不知畨陽都尉治太守不與都尉同治也愚謂閻說是矣而有未盡者據高紀下卷漢六年韋昭注推之丹陽郡首宛陵而其實不爲治治丹陽說詳後第十七卷而閻遺漏未舉南陽郡首宛縣而翟義傳云以

南陽都尉行太守事行縣至宛若南陽太守治宛則不得言行縣至矣知宛亦非太守治也而閻亦遺漏未舉西河郡首富昌不爲治治平定見東觀漢記唐元和志敍汾州沿革一段內言漢武帝置西河郡理富昌亡友休寧戴吉士震辨其誤見戴氏遺書之二十三文集卷八而閻亦不知也

水經三十七卷葉榆水篇注麋冷縣漢武帝元鼎六年開都尉治交趾郡及州本治於此然則交趾郡太守及交州刺史與都尉皆同治此縣也此南蠻地新開者不可以一例論至後漢則交趾太守改治龍編交州刺史改治廣信矣

### 都尉漏書

卽以都尉論之郡國一百三有都尉者凡五十九無都尉者四十四此四十四郡國果無都尉乎抑有而不書乎京兆尹下當有都尉闕漏不書別見其他如河東都尉趙護拜爲廣漢太守見成紀及薛宣傳張湯之玄孫放亦嘗爲河東都尉見湯傳周陽由亦嘗爲河東都尉見酷吏傳河東有都尉甚明而今志河東無都尉哀帝擢右師譚爲潁川都尉見息夫躬傳潁川有都尉甚明而今志潁川無都尉景帝召拜枚乘爲弘農都尉見本傳據志武帝元鼎四年置弘農郡則景帝無此郡當係追書又尹翁歸舉廉爲弘農都尉見本傳弘農有都尉甚明而今志弘農無都尉杜周之曾孫業嘗爲上黨都尉見周傳上黨有都尉甚明而今志上黨無都尉又義縱爲河內都尉亦見酷吏傳河內有都尉甚明而今志河內無都尉趙充國傳充國至金城渡河遂至

西部都尉府孟康曰在金城金城有都尉甚明而今志金城無都尉皆脫漏也且卽以百官表所列都尉名目論之於平常都尉之外別列者僅有關都尉農都尉屬國都尉三種名目而關都尉必司關津天下關津多矣乃僅巴郡魚復縣江關都尉一見他如弘農郡弘農縣下注云故秦函谷關考杜周之曾孫業亦曾爲函谷關都尉此事亦見周傳而辛慶忌之子遵亦曾爲之見慶忌傳丞相車千秋之弟亦曾爲之見魏相傳張敞亦曾爲之見本傳此正百官表所謂關都尉也志乃但注關名不言有關都尉明係脫漏則其他脫漏者多矣農都尉必司農事敍傳云班況爲上河農都尉師古曰上河地名農都尉者典農事是也此亦必不止一處乃僅張掖番和縣一見何也其必有脫漏明矣屬國都尉志五見天水勇士縣安定三水縣上郡龜茲縣西河美稷縣五原蒲澤縣是矣而張掖亦屬國都尉匈奴傳右賢王犁汗王四千騎入日勒屋蘭番和張掖太守屬國都尉擊破之是也今志張掖郡但云都尉無屬國二字此又脫文也若乃左輔右輔都尉以三輔故別之各郡東部西部南部北部中部都尉以一郡中不一都尉故別之亦非別立名不必提出至於騎都尉天水穎道一見宜禾都尉敦煌廣至一見主騎都尉安定參繙一見渾懷都尉北地富平一見匈奴都尉上郡一見旣別立名自與平常都尉不同宜於表中提明此官制所關而表竟不言是又表之疏漏也

王溫舒爲廣平都尉尹齊爲淮陽都尉皆見酷吏傳而今志此二國無都尉此則非漏書蓋此是國非郡

國但有相有內史有中尉不當有都尉但二國曾罷爲郡終爲國觀年表及汲黯傳黯曾爲淮陽太守卽可見酷吏傳據爲郡時耳志所載二十國無一都尉知二國亦不當有

### 書法體例不一

以都尉書法論之大約皆注於其所治縣下而五原郡下注云東部都尉治穎陽屬縣穎陽下不注朔方郡下注云西部都尉治窳渾屬縣窳渾下不注而其他縣渠搜下則又注中部都尉治廣牧下則又注東部都尉治此其體例之不一者也汝南郡下注云辨分爲黨都尉其屬縣汝陰下注云都尉治宜祿下注云辨曰黨都亭未詳又以雜官書法論之大約皆注於其所置之縣下如京兆尹鄭縣下注有鐵官之類至弘農郡下注有鐵官在龍池又於宜陽縣下注在龍池有鐵官也而龍池縣下反不注河南郡下注有鐵官工官其屬縣無之泰山郡下注有工官不言在何縣其屬縣奉高下又注有工官廣漢郡下注有工官其屬縣雒下又注有工官貢禹傳如淳注官亦據文而說耳太原郡下注有鹽官在晉陽其屬縣晉陽下又注有鹽官此亦其體例之不一者也以山之書法論之大約皆注於其所在之縣下而雁門郡下注句注山在陰館其屬縣陰館下不注此亦其體例之不一者也以水之書法論之大約皆注於其所出之縣下然有詳言其過幾郡行幾里者有不言過幾郡行幾里而但言其所出入者此亦其體例之不一者也以各郡建置之書法論之有但云某帝置者有詳述某帝某年置者又郡國皆注建置沿革縣無之而亦間或有之此亦其體例之不一者也蓋本無一

定體例。有因其故籍之詳略而詳之略之者。有臨文竊疏失於檢照。遂成疵類者。有傳寫差誤。未經校改者。魯地一條。末云當考。師古曰。當考者。言當更考覈之。其事未審。班書之當考者。蓋亦多矣。敦煌郡效穀縣下注。本漁澤障也。考孫寶傳。尙書僕射唐林坐朋黨比周。左遷敦煌漁澤障候。則效穀縣下當注云。有候官。今無者。亦脫漏。且其上敦煌縣下有步廣候官。而效穀無候官。脫漏顯然。想雜官脫漏者。當不止此一處。

### 王都

凡縣之封侯者。必注云。侯國。仍屬郡。與他縣不爲國者同。而王國則改稱國。若縣之爲王都者。如江夏郡邾縣注云衡山王吳芮都。清河郡清陽縣注云王都。泰山郡盧縣注云濟北王都。桂陽郡郴縣注云項羽所立義帝都。此南海郡番禺縣注云尉佗都。信都國信都縣注云王都。廣陵國廣陵縣注云江都易王非、廣陵厲王胥皆都。此可見王都不必定在第一縣。其書法詳略參差。并以見在之王與已往之故王雜錯而書之。不必論。但王都多矣。獨見此七處何也。其義例不可曉。

文三王傳。代孝王參傳。代王都晉陽。今太原郡晉陽不注。此類甚多。不悉出。

梁國屬縣八。睢陽居末。此國自孝王武始封。而七國反。梁守睢陽。孝王又廣其城。大治宮室。睢陽爲梁都甚明。賈誼請徙代王都睢陽。代王卽梁。當如誼策。乃居末。此國直傳至元始方除。蓋始終都睢陽。而志以居末。可見王

國都不必定首縣舉一可知其餘



# 十七史商榷卷十七

## 漢書十一

故郡

秦以京師爲內史。京師之外分三十六郡。河東郡、太原郡、上黨郡、三川郡、東郡、潁川郡、南陽郡、南郡、九江郡、泗水郡、鉅鹿郡、齊郡、琅琊郡、會稽郡、漢中郡、蜀郡、巴郡、隴西郡、北地郡、上郡、九原郡、雲中郡、雁門郡、代郡、上谷郡、漁陽郡、右北平郡、遼西郡、遼東郡、南海郡、桂林郡、象郡、邯鄲郡、碭郡、薛郡、長沙郡。見班地理志。但史記秦始皇本紀云。秦初并天下。分以爲三十六郡。裴駟注歷舉三十六郡之名。雖與班志約略相同。而無南海、桂林、象郡三郡。卻以內史充數。又添入障郡、黔中。是爲三十六。晉書地理志同。愚謂班志、裴注各有誤。何則。始皇本紀又云。三十三年。發諸嘗逋亡人賛壻賈人。略取陸梁地爲桂林、象郡、南海、南越尉佗傳亦云。秦時已并天下。略定揚越。置桂林、南海、象郡。則三郡爲秦置無疑。史記南越傳於敘畢武帝元鼎六年破南越事之下乃云

南越已平矣。遂爲九郡。徐廣注九郡名有南海蠻林。曰。然并天下係二十六年事。其時已定三十六郡。南蠻林卽桂林。曰。南卽象郡。此皆秦郡。非武帝始置也。

卽象郡詳蕭宗章亦非謂一并天下卽有領外意亦是說後來所置。

漢西南夷傳。楚威王時。使將軍莊蹻將兵循江上。略巴、黔中以西。蹻至海等三郡。是三十三年所置。相去已八年。不應人三十六郡之數。班志疑誤。

後書南蠻傳秦并天下威服始開領外置南海桂林

滇池方三百里。旁平地肥饒數千里。以兵威定屬楚。欲歸報。會秦擊奪楚巴、黔中郡道塞不通。因以其衆王滇。秦時嘗破略通五尺道。諸此國頗置吏焉。十餘歲。秦滅漢興。皆棄此國。巴郡雖在三十六郡數內。而黔中更荒遠。略通置吏。僅十餘歲。而秦已滅。則黔中之屬秦已當始皇三十年以後去二十六年初并天下。亦已久矣。自不當在三十六郡數內。裴注亦誤。至兩粵傳云。閩粵王無諸及粵東海王搖。其先皆粵王句踐之後。秦并天下。廢爲君長。以其地爲閩中郡。此一郡則班志、裴注皆未之及。此置郡亦必在始皇三十年後。非初并天下事。且秦雖置郡。仍爲無諸與搖所據。秦不得而有之。所以漢擊楚。二人卽率越兵來助。故不當在三十六郡數也。然則於班志去三外。應入內史。蓋班志郡國一百三。連三輔數。則秦三十六郡。亦應連內史數。外尙少二。姑闕其疑。鄣郡亦似非說見下。

高紀。漢二年。章邯自拔。雍州定八十餘縣。置河上、渭南、中地、隴西、上郡。服虔曰。河上卽左馮翊也。渭南京兆也。中地、右扶風也。師古曰。凡新置五郡案。隴西、上郡乃秦故郡。非新置。其餘三郡皆新置。見本志。蓋雍州地已爲雍、塞、翟三國。今滅其國。置五郡。三郡新置。二郡復故。非新置。而不分析者。史約言之耳。又高紀。漢二年。韓信虜魏豹。定魏地。置河東、太原、上黨郡。魏豹傳略同。三郡皆秦故郡。而此云云者。非謂漢始置此郡也。項羽王豹於河東爲西魏王。則此三郡爲魏國。不爲郡矣。今虜豹。以其地仍爲郡。復故非新置。史約言之。又荆王劉賈傳。賈擊臨江王共尉。尉死。以臨江爲南郡。南郡秦故郡。此亦復故非新置。據文當云。

復以臨江爲南郡。史約言之。又高紀漢三年擊趙獲趙王歇置常山代郡。常山高帝新置代郡秦故郡復故非新置不分析者。史約言之。惟高紀漢五年以長沙豫章象郡桂林南海立番君芮爲長沙王。劉放辨豫章傳寫誤加此條則劉說是非豫章新置餘四郡秦故郡而史家約言之之謂。

樊噲傳破河間守軍於杠里。河間國文帝二年置此云河間守亦必楚漢間權立其名。

河南郡故秦三川郡高帝更名高紀秦二年斬三川守李由應劭曰三川今河南郡其下文敍項羽分割諸侯以申陽爲河南王都洛陽其下文漢二年河南王申陽降漢置河南郡郡名因項氏所立故國名。高紀漢六年以故東陽郡鄣郡吳郡五十三縣立劉賈爲荆王以碭郡薛郡鄖郡三十六縣立弟文信君交爲楚王以雲中雁門代郡五十三縣立兄宜信侯喜爲代王以膠東膠西臨淄濟北博陽城陽郡七十三縣立子肥爲齊王以太原郡三十一縣爲韓國徙韓王信都晉陽此段乍觀之以一故字貫下諸名似有十六郡皆秦故郡矣詳考之則惟碭郡薛郡雲中雁門代郡太原六郡爲秦故郡其餘若吳郡則後漢所分說詳後非秦郡至東陽文穎以爲卽下邳乃東海屬縣非秦郡臨淮屬縣有東陽名同地異鄣郡文穎以爲丹陽文穎是說楚漢間鄣郡地卽漢武帝丹陽郡地非說郡治在丹陽縣蓋武帝時丹陽郡所治自在丹陽其前則爲鄣郡治故鄣故章昭曰鄣郡今故鄣縣也後郡徙丹陽轉以爲縣故謂之故鄣也此卽今廣德州春秋以來名桐汭當鄣郡治此之時不知何名後武帝改郡名爲丹陽郡其治亦徙丹陽縣其後直至孫權方改秣陵

爲建業。丹陽郡治徙於此。六朝都以丹陽尹比京兆尹。今江寧府上元、江寧二縣也。而太平、寧國二府交界處，疑是西漢丹陽郡治。於是鄣郡所治之縣，即謂之故鄣。而鄣郡實非秦郡。沈約宋書州郡志云：丹陽秦鄣郡治今吳興之故鄣縣。漢武帝元封二年爲丹陽郡治。今丹陽郡治宛陵如韋昭說；則治丹陽。韋昭三國吳人，通經大儒。沈約齊梁人，輕薄文士。沈說自不如韋說可據。今定從韋。鄣郡文穎以爲東海郡志於東海下注高帝置應劭則云秦鄭郡而鄭郡實非秦郡。疑此皆楚漢間權立其名。其膠東、膠西、臨淄、濟北、博陽、城陽、除膠東、城陽、漢國外餘以本紀及諸侯王表并史記齊悼惠王世家等篇考之。或爲文景以後所建國或爲縣名。不但非秦故郡，并有非漢郡者。此在秦皆齊郡、琅琊郡二郡地耳。作史者立文取便，隨意言之。假借後名，以紀前事。故其文參錯如此。其縣數雲中、雁門、代郡志凡四十三縣。此云五十三。太原志凡二十一縣。此云三十一。四誤爲五。二誤爲三耳。餘姑勿深攷。

丹陽郡注。故鄣郡劉敞原父刊誤云：秦分三十六郡無鄣郡。此但當云故鄣不當益郡字。此劉之誤。非班之謬。劉固未喻班意也。凡秦所置故郡漢因之者，則如河東郡但注云秦置是也。秦所置其後有所改易而復故者，則如潁川郡注云秦置高帝五年爲韓國六年復故是也。秦所置漢直改之者，則如河南郡注云故秦三川郡高帝更名是也。不因秦名屢經改易卒從後定者，則如京兆尹注云故秦內史高帝元年。帝十六年別爲國者，卽淮南王傳文帝立厲王子賜爲廬江王是也。然則高帝卽稱故不必秦。高紀六年屬塞國二年更爲渭南郡九年罷復爲內史。武建元六年分爲右內史。太初元年更爲京兆尹是也。若廬江郡注云故淮南文帝十六年別爲國所謂故淮南者，卽高帝紀四年立黥布爲淮南王是也。所謂文

已有鄣郡故云故鄣郡何必以秦無鄣郡欲去郡字邪。吳王濞傳荆王劉賈爲蠶布所殺高祖破布立濞爲荆吳文穎曰卽今吳也高帝六年爲荆國十年更名吳師古曰荆吳同是一國三郡卽東陽郡鄣郡吳郡其下又云孝惠高后時吳有豫章郡銅山草昭注云此有豫字誤但當云章郡今故章也其下又云及削吳會稽豫章郡書至豫字亦衍然則漢初已有鄣郡甚明但不知其所始。

灌嬰傳旣斬項籍度江定吳豫章會稽郡此史記文班用之者會稽秦故郡豫章新置至於分吳會稽爲二則據續志後漢順帝始然班固卒於和帝永元四年分二郡之事固所未及見況司馬遷乎吳王濞傳云上患吳會稽輕悍亦以吳會稽並言若謂漢初已有吳郡恐未必然蓋會稽郡屬山陰縣注會稽山在南揚州山越王句踐本國此實今紹興府治若蘇州府治吳縣則吳本國也秦人無端忽移越國都之山名以名吳國都名實不相應當時人稱謂之間必有不順於口而嫌於舉此遺彼者故往往以吳會稽連言之由今揣之當必爲是范成大吳郡志第四十八卷考證門歷引三國六朝人言吳會皆指兩郡而言非謂吳門爲東南一都會此雖在既分兩郡後而西漢人之稱吳會稽意亦如此讀者皆勿泥莊子釋文在餘杭郡後漢以爲吳會分界吳會稽猶言吳越

縣名相同

郡國縣邑名同者則加東西南北上下或新字以別之京兆尹有新豐沛郡有豐故此加新有下邦隴西郡有上邦故此云下河南郡有新鄭京兆尹有鄭故此加新東郡有東武陽犍爲郡有武陽故此加東而

泰山郡又有南武陽。陳留郡有外黃。魏郡有內黃。故此云外。穎川郡有新汲。河內郡有汲。故此加新。南陽郡有西鄂。江夏郡有鄂。故此加西。江夏郡有下雉。南陽郡有雉。故此加下。山陽郡有南平陽。河東郡有平陽。故此加南。而泰山郡又有東平陽。鉅鹿郡有下曲陽。常山郡有上曲陽。故此云下。而九江郡亦有曲陽。續志作西曲陽。清河郡有東武城。左馮翊有武城。故此加東。而定襄郡亦有武城。涿郡有南深澤。中山國有深澤。故此加南。勃海郡有東平舒。代郡有平舒。故此加東。千乘郡有東鄒。濟南郡有鄒。故此加東。濟南郡有東平陵。右扶風有平陵。故此加東。五原郡有西安陽。代郡有東安陽。故此云西。遼西郡有新安平。涿郡、豫章郡俱有安平。故此加新。甾川國又有東安平。闕云：博陵有安平。故云東。而遼東又有西安平。闕說詳後。中山國有北新成。河南郡有新成。故此加北。而北海郡亦有新成。東平國有東平陸。西河郡有平陸。故此加東。惟常山郡有南行唐。而他郡別無行唐。則不可考。

其無東西等字爲別者。據錢大昭考得相同者亦甚多。有一縣三見者。如曲陽。一屬九江郡。一屬東海郡。一屬交趾郡。交趾作易師古曰。古陽字。建成。一屬勃海郡。一屬沛郡。一屬豫章郡。安定。一屬鉅鹿郡。一屬安定郡。一屬臨淮郡。陽城。一屬穎川郡。一屬汝南郡。平昌。一屬平原郡。一屬琅邪郡。成陽。一屬汝南郡。一屬濟陰郡。東安。一屬東海郡。一屬城陽國。新陽。一屬汝南郡。一屬東海郡。鍾武。一屬江夏郡。一屬零陵郡。成。一屬

涿郡一屬泰山郡新市一屬鉅鹿郡一屬中山國建陽一屬九江郡一屬東海郡平安一屬千乘郡一屬廣陵國平城一屬北海郡一屬雁門郡臨朐一屬東萊郡一屬齊郡新都一屬南陽郡一屬廣漢郡昌陽一屬東萊郡一屬臨淮郡定陵一屬潁川郡一屬汝南郡高平一屬臨淮郡一屬安定郡饒一屬北海郡一屬河西郡高陽一屬涿郡一屬琅邪郡武城一屬左馮翊一屬定襄郡廣平一屬臨淮郡一屬廣平國陰山一屬河西郡一屬桂陽郡樂成一屬南陽郡一屬河間國富平一屬平原郡一屬北地郡成安一屬陳留郡一屬潁川郡復陽一屬南陽郡師古音房日反一屬清河國應劭音腹鄼一屬南陽郡孟康音讚一屬沛郡應劭音嵯武陽一屬東海郡一屬犍爲郡鄭一屬京兆尹一屬山陽郡成鄉一屬北海郡一屬高密國安陽一屬汝南郡一屬漢中郡陽樂一屬東萊郡一屬遼西郡武都一屬武都郡一屬五原郡歸德一屬汝南郡一屬北地郡東陽一屬臨淮郡一屬清河郡黃一屬山陽郡一屬東萊郡安丘一屬琅邪郡一屬北海郡開陽一屬東海郡一屬臨淮郡樂陵一屬平原郡一屬臨淮郡安成一屬汝南郡一屬長沙國西陽一屬江夏郡一屬山陽郡安平一屬涿郡一屬豫章郡高成一屬南郡一屬勃海郡新昌一屬涿郡一屬遼東郡新成一屬河南郡一屬北海郡

### 三輔

分一內史爲左右又改右內史爲京兆尹左內史爲左馮翊又改主爵都尉爲右扶風亦治右內史是爲

三輔武帝太初元年所定此地理志文而亦見百官表彼下文云元鼎四年更置三輔都尉元鼎在太初之前然則三輔分治其制當元鼎已定特其名尚未改耳讀者不以文害辭可也

東方朔傳建元三年詔中尉左右內史云云師古曰時未爲京兆馮翊扶風故云中尉及左右內史其下又云三輔之地盡可以爲苑云云師古曰中尉及左右內史則爲三輔矣非必謂京兆馮翊扶風也學者疑此言爲後人所增斯未達也再追溯之則前引高紀河上渭南中地高帝時已分爲三

據百官表三輔各有一都尉而地理志左馮翊高陵縣左輔都尉治右扶風郿縣右輔都尉治京兆尹獨無都尉此係疏漏汲古閣刻百官表作二輔都尉何義門改三南監本亦作三趙廣漢傳云爲陽翟令以治行尤異遷京輔都尉京輔卽京兆其治華陰見宣紀本始元年注三輔俱有都尉甚明張敞傳云京兆典京師長安中浩穰於三輔尤爲劇左右輔有都尉無京兆獨無之理

循吏傳黃霸淮陽陽夏人補左馮翊二百石卒史如淳曰三輔郡得任用它郡人而卒史獨二百石所謂尤異者也凡卒史皆用本郡人祿百石三輔不然故如淳云云

### 宗室不宜典三河

劉歆傳歆忤執政大臣求出補吏爲河內太守以宗室不宜典三河徙守五原云云宗室不宜典三河不曉其何故他無所見獨見於此俟考

# 十七史商榷卷十八

## 漢書十二

### 地理雜辨證一

京兆尹鄭縣周宣王弟鄭桓公邑其說甚明白而臣瓊乃謂周自穆王都西鄭不得以封桓公桓公爲周司徒寄帑於虢會幽王旣敗滅會滅虢居鄭父之丘是以爲鄭桓公無封京兆之文師古駁之謂穆王無都西鄭事桓公死幽王之難其子武公始東遷新鄭是矣案說文鄭周厲王子友所封宗周之滅鄭徙澮洧之下今新鄭是也河南郡屬縣有新鄭特加新字所以別於京兆之鄭爲桓公始封邑也兗州山陽郡之鄭則與此無涉

湖故曰胡武帝建元年更名湖案郡國志注前志有鼎湖此大字湖字之上脫鼎字小字胡應加水傍建元之下脫一字更名之下又脫鼎字南監本脫誤並同

南陵沂水出藍田谷北至霸陵入霸水霸水亦出藍田谷北入渭師古曰茲水秦穆公更名以章霸功視子孫沂音先歷反視讀曰示京兆安得有沂水嘉定錢坫獻之云據水經注第十六卷澇水篇說文卷十上水部沂水當作澇水錢說是顏乃讀沂爲先歷反則以此爲音析謬甚唐初本已誤矣又北入渭之一

下衍一師字視子孫之下脫師古曰三字南監脫誤並同。

左馮翊夏陽禹貢梁山在西北龍門山在北案禹貢山水班載之者分三等但稱禹貢者蓋博士所習今文家說云古文以爲云云者此孔壁中所得孔安國說有不稱古文並不著禹貢而直言在某處者蓋以目驗著之此梁山卽冀州治梁之梁龍門卽導河至於龍門者也詳尙書後案司馬遷自序云遷生龍門徐廣曰龍門在馮翊夏陽縣張守節曰遷卽夏陽縣人至唐改韓城縣

懷德禹貢北條荆山在南下有彊梁原洛水東南入渭雍州篇案北條荆山卽所謂導岍及岐至於荆山者馬融三條之說本此詳見後案職方雍州其浸渭洛鄭注洛出懷德非導熊耳之洛

徵注云左傳所云取北徵取上南監有王字

右扶風鄠古國有扈谷亭扈夏啟所伐詳後案甘誓又云酆水出東南北過上林苑入渭卽雍州豐水攸同亦見後案

釐注云音咍咍南監作胎是

郁夷詩周道郁夷師古曰周道倭遲韓詩作郁夷書盤庚遲任陸德明音直疑反又引徐邈音持夷反匡謬正俗云遲任音夷亦音遲陵遲或言陵夷遲卽夷也

美陽禹貢岐山在西北詳後案禹貢冀州

漆水在縣西卽雍州漆沮既從詳後案

岍吳山在西古文以爲岍山雍州山卽禹貢導岍詳後案職方雍州其山鎮曰嶽山是武功大壹山古文以爲終南垂山古文以爲敦物皆在縣東俱見禹貢雍州詳後案

弘農郡弘農衙山領下谷爛水所出北入河衙南監同水經注作衡傳寫誤

盧氏熊耳山在東伊水出東北入雒熊耳山見禹貢導洛伊水見豫州俱詳後案

新安禹貢澗水在東南入雒見豫州詳後案

上雒禹貢雒水出冢領山東北至鞏入河過郡二豫州川過郡二弘農河南也豫州川職方豫州其川榮雒是也鞏縣入河漢時水道後世洛口東移矣詳後案

河東郡屬縣二十四而尹翁歸傳云田延年爲河東太守重翁歸署督郵河東二十八縣分爲兩部使閼孺部汾北翁歸部汾南彼八字必是四字之誤

垣禹貢王屋山在東北沇水所出東南至武德入河軼出榮陽北地中又東至琅槐入海過郡九行千八百四十里此卽所謂導沇水東流爲濟云云者此志但云垣而鄭康成彼注稱東垣職方注及說文水部同未詳武德入河爲禹迹其後改從溫縣入河而河北濟源日短說詳後案何氏讀書記於河內郡溫縣下評云續書郡國志溫下注濟水所出王莽時大旱遂枯絕孟堅不載豈爲此邪濟四瀆之一孟堅豈有不載一繙紙讀漢書太善忘矣此書誤者不悉出聊一見之過郡九謂河東河內河南濟不載河內河東相隔一繙紙讀漢書太善忘矣此書誤者不悉出聊一見之過郡九謂河東河內河南濟

陰、山陽、東郡、平原、勃海、千乘也。

彘霍太山在東。冀州山。卽禹貢冀州至於岳陽職方。冀州其山鎮曰霍山。是詳後案。北屈禹貢壺口山在東南。卽冀州壺口。詳後案。注云。翟章救鄭。至於南屈。至南監作次。

太原郡榆次梗陽鄉魏戊邑。戊。南監作成。

鄆九澤在北。是爲昭餘祁。并州藪。見職方。

汾陽北山汾水出西南至汾陰入河過郡二冀州嘉案過郡二太原河東也職方冀州其浸汾潞上黨郡長子濁漳水入青漳青南監作青是。

沽大閼谷清漳水所出東北至邑成入大河過郡五冀州川休寧戴震東原云。閼本要字篆文要似閼故誤戴說是。邑成當作昌成。後漢改阜成。故鄭注禹貢作阜成。詩邶鄘衛譜疏引此志作阜成者非。元文清漳卽禹貢冀州至於衡漳過郡五上黨郡魏郡廣平國鉅鹿郡信都國也。冀州川見職方俱詳後案。

壺關注云有羊腸版版南監作阪是。

泫氏注云絕水所出絕字疑南監同後書萬修傳子普封泫氏侯注泫氏縣名屬上黨郡西有泫谷水故以爲名今澤州高平縣也。

河內郡州其州下南監空一格是此誤連北山淇水所出鄭康成以爲共水卽禹貢所謂導河北過降水

者詳後案。

朝歌錢大昭云續志謂前書注鹿臺在城中今無此句。

欒王太行山在西北卽禹貢所謂太行恆山者詳後案。

蕩陰注云蕩水東至內黃澤蕩廣韻作瀉澤字上下疑有脫誤。

河南郡雒陽注春秋昭公二十一年南監作二十二年當作三十二年。

中牟圃田澤在西豫州數見職方。

卷廣韻作考後馬援傳亦作卷李賢注卷縣故城在今鄭州原武縣西北。

穀成禹貢瀍水出替亭北見豫州詳後案續志作穀城。

密有大駢山潩水所出說文水部作大魄。

新成續志作新城。

開封注梁惠王發逢忌之藪以賜民今浚儀有逢陂、忌澤是也哀十四年左傳疏引此發作廢逢陂、忌澤作逢忌陂。

成皋續志作成皋班注有虎牢而顏注作獸牢避唐諱。

東郡頓丘注頓丘謂一成而成南監作一頓而成是此誤。

東武陽禹治漯水東北至千乘入海過郡三卽禹貢兗州浮於濟漯之漯過郡三東郡平原千乘也詳後案。

臨邑有涑廟涑南監作湧是此誤。

壽良注世祖父叔名良故曰壽張父叔南監作叔父是故當作改南監亦誤世祖九歲而孤養於叔父良故諱之。

樂昌水經注作昌樂非。

陳留郡小黃成安黃上南監空一格是此誤連。

封丘濮渠水首受涑南監作湧是。

僞續志作隱屬梁國。

浚儀睢水首受狼湯水東至取慮入泗過郡四杜預釋例曰睢水受汴東經陳留梁國譙郡沛國至彭縣入泗。

潁川郡審高古文以爲外方山卽禹貢所謂熊耳外方詳見後案。

綸氏續志注云建初四年置建初是後漢章帝號如此縣果係建初所置班氏安得載之疑彼文誤或是武帝太初或是元帝建昭成帝始哀帝建平。

汝南郡莽曰汝汾分爲賞都尉案此郡屬縣宜祿縣莽曰賞都亭則此分爲賞都尉者疑卽賞都之尉別治者非以都尉連文也

女陽注女讀曰汝下汝陰同汝陰當作女陰南監亦誤

銅陽注孟康曰銅音紂南監此下有紅反二字是此脫新息息說文作卽云姬姓國在淮北今汝南新卽

南陽郡穰說文作鄭云今南陽鄭縣

比陽注云比水所出水經注二十九卷有泚水實卽此比水俗刻多誤作泚水并廬江瀕泚水亦誤作泚觀班志愈見彼俗刻之誤後漢皇后紀章德寶皇后父勳尚東海恭王彊女泚陽公主和帝卽位尊后爲皇太后皇太后尊母泚陽公主爲長公主兩泚字皆當作泚

平氏禹貢桐柏山在東南淮水所出東南至淮陵入海過郡四行三千二百四十里淮陵禹貢疏引之又誤作睢陵其實則當作淮浦水經云淮水至廣陵淮浦縣入海淮浦縣屬臨淮郡晉改屬廣陵過郡四者南陽汝南九江臨淮也行三千二百四十里太遠三千當作二千南監誤並同  
春陵後漢建武十八年更名章陵師古曰元朔五年以零陵冷道之春陵鄉封長沙王子買爲春陵侯至戴侯仁以春陵地形下溼上書徙南陽案王子侯表戴侯名熊渠孝侯名仁師古乃引作戴侯仁非也復陽注在下復山之陽下當作大南監誤同

南郡江陵故楚郢都。楚文王自丹陽徙此。案後丹陽郡丹陽縣下云。楚之先熊繹所封。十八世文王徙郢。莊子外篇天運篇陸氏釋文云。郢、楚都。在江陵北。江陵卽今湖北荊州府治。而丹陽頗多異說。辨見後。臨沮禹貢南條荆山在東北。漳水所出。東至江陵入陽水。陽水入沔行六百里。南條荆山卽禹貢荆及衡陽。惟荊州之荆。漳水卽導漢節所謂滄浪之水。陽水卽夏水。亦卽滄浪。但隨地異名。詳後案。

華容雲夢澤在南。荊州藪夏水首受江。東入沔行五百里。雲夢見禹貢。荊州藪見職方。夏水見上。亦卽荊州沱潛旣道之沱。俱詳後案。

中廬郡國志作中盧。

枝江江沱出西。東入江。師古曰。卽江別出者。此說非是。鄭康成駁之。爾雅水自江出爲沱。師古妄附會之。詳後案。

編注云。有雲夢官。南監同。校本改作宮。此特因下江夏郡西陵縣有雲夢宮耳。其實未見必爲宮。

巫夷水東至夷道入江。過郡二行五百四十里。高成流山。流水所出。東入絲絲水。南至華容入江。過郡二行五百里。巫與夷道高成與華容俱屬南郡。二水所過。俱不當有二郡。二俱當作一。南監誤同。

江夏郡竟陵。章山在東北。古文以爲內方山。章山鄭康成尙書注作立章山。郡國志同。不知是別名抑或傳寫誤分章字頭別加立字。詳後案。

安陸橫尾山在東北古文以爲倍尾山詳後案

江夏郡沙羨晉灼曰羨音夷楊慎曰文之謚辭曰羨文璧之謚緣曰璧羨沙羨音夷蓋方言耳

廬江郡尋陽禹貢九江在南說見下文詳後案

灊沘山沘水所出沘水見水經注三十二卷俗刻多誤作沘水觀此益知彼俗刻之譌此與前南陽比陽比水無涉

皖从目後馬援傳作皖从日傳寫誤耳彼李賢注皖今舒州懷寧縣俗乃作皖說文絕無此字俗妄作之遂盛行幸漢書可攷

九江郡注云秦置高帝四年更名爲淮南國武帝元狩元年復故第一縣壽春邑注云楚考烈王自陳徙此水經注三十卷淮水篇云淮水東北流逕壽春縣故城西縣卽楚考烈王所徙秦始皇立九江郡治此兼得廬江豫章地故以九江名郡案此九江卽禹貢所謂九江孔殷九江納錫大龜者詳見後案趙宋人妄造異說未讀漢書耳

合肥應劭曰夏水出父城東南至此與淮合故曰合肥案夏水與淮合之淮鄆氏水經注引作肥而云闢駟之言與應劭同余案川流派別無沿注之理方知應闢二說非實證也蓋夏水暴長施合於肥故曰合肥非夏水自父城逕合肥也

曲陽郡國志作西曲陽常山有上曲陽鉅鹿有下曲陽此西字不可省。

山陽郡戶十七萬二千八百四十七口八十萬一千二百八十八案張敞傳戶九萬三千口五十萬以上二者不同志據元始故也卽此可見元始比盛漢倍之。

湖陵禹貢浮於泗淮通於河水在南泗淮當作淮泗河當作菏見說文水部所引當從之今尚書亦作河誤與班志同賴說文引得存古文說詳後案又說文作胡陵本注應劭曰章帝封東平王蒼子爲湖陵侯更名湖陵疑此二湖字俱當作胡許慎應劭俱據後漢所改而言。

橐莽曰高平漢章帝復莽故號曰高平。

鉅壠大壠澤在北兗州戴大壠卽大野見禹貢詳後案又見職方。

# 十七史商榷卷十九

## 漢書十三

### 地理雜辨證二

濟陰郡注云禹貢荷澤在定陶東定陶縣注云禹貢陶丘在西南陶丘亭凡禹貢山水皆載逐縣下此以荷澤注郡下陶丘注縣下別無義例隨手援引遂多岐出耳詳見後案又據史記集解所載鄭康成禹貢注引地理志云陶丘在濟陰定陶西北今志作西南南字誤

成陽禹貢雷澤在西北詳後案曹詩譜疏引此作雷夏澤

秔說文卷九下广部云廩从广耗聲濟陰有廩縣此作秔誤

乘氏泗水東南至睢陵入淮過郡六行千一百一十里說詳後案睢陵屬臨淮郡今爲睢寧縣治非泗入淮處睢陵當作淮陰亦詳後案

沛郡說文卷六下邑部云毗沛郡从邑市聲

下蔡故州來國爲楚所滅後吳取之至夫差遷昭侯於此昭侯上脫一蔡字南監亦脫并誤於此作如此春秋哀公二年蔡遷於州來

豐郡國志云豐有粉榆亭注引前志注粉榆社在縣東北十五里今此志注無此句

塙續作紅

鄭莽曰贊治應劭曰音嵯說文作鄧云沛國縣

魏郡鄴故大河在東北入海案此本漳水與河經流徒駭相亂班因目爲故大河實非禹河說詳後案  
館陶河水別出爲屯氏河東北至章武入海過郡四行千五百里章武屬勃海郡郡治浮陽卽今滄州過  
郡四者東郡清河平原信都也除去所出之魏郡及入海之勃海郡不數故但言四郡若連首尾言之則  
六郡他水皆連首尾爲所過郡此又不畫一鄭康成以屯氏河爲禹河詳後案

內黃注吳會諸侯於黃池掘溝於齊魯之間齊當作商卽宋也

黎陽晉灼曰黎山在其南河水經其東其山上碑云縣取山之名取水之陽以爲名水之陽南監作水在  
其陽酈道元引仍作水之陽詳洛誥後案

卽裴說文卷十二上手部作擗云猝也从手卽聲魏郡有擗裴侯國王子侯表上有擗裴戴侯道鄭氏曰  
擗裴音卽非在肥鄉縣南五里  
鉅鹿郡王莽分鉅鹿爲和成郡居下曲陽見後書邳彤傳注所引東觀漢記班固雖頗載莽所更改於志  
而此類亦皆略去不悉見也

鉅鹿禹貢大陸澤在北詳後案又云紂所作沙丘臺在東北沙丘臺疑卽鹿臺

南蠻郡國志作南蠻誤

下曲陽注荀吳滅鼓今鼓聚昔陽亭是案昔宋本作晉

鄭說文作鄆云鉅鹿縣

堂陽嘗分爲涇縣涇南監作經是此誤

常山郡高帝置高帝紀云三年置

元氏沮水首受中丘西山窮泉谷中宋本作申案中丘縣名在下文宋本似非

石邑洨水所出洨音效效字脫宜從南監增

靈壽禹貢衛水出東北上曲陽恆山北谷在西北并州山禹貢恆水所出恆衛詳後案并州山見職方關通鑑注引作開是也此誤宋白曰欒城縣本漢開縣後魏太和十一年於開縣故城置欒城縣續郡國志常山有欒城而無開則不始於後魏太和矣

涿郡故安易水出并州瀘見職方

蠡吾趙廣漢傳云涿郡蠡吾故屬河間

勃海郡說文卷六下邑部云郭郭海地从邑李聲一曰地之起者曰郭

安次修市次下南監空一格是此誤連。

平原郡般注音通坦反宋本同南監作通垣一作連完。

阿陽天水郡亦有此縣錢大昭以爲名同愚謂五行志成帝過河陽主作樂見舞者趙飛燕幸之外戚傳云趙飛燕徵時屬陽阿主家成帝徵行過陽阿主見說之召入宮師古曰陽阿平原縣俗書阿作河又或爲河陽皆後人妄改趙明誠金石錄載李翕碑云漢故武都太守漢陽阿陽李君後漢漢陽郡卽前漢天水郡係明帝改名碑當時所作必不誤外戚傳連稱陽阿亦當無謬據師古注及碑校之似平原當作陽阿天水當作阿陽後書宋均傳均之族子意拜阿陽侯相注云阿陽故屬天水郡郡國志漢陽郡有阿陽縣然則天水之縣名阿陽甚明而青州平原郡則不復有阿陽亦無所謂陽阿者疑是光武建武六年所省并錢大昭說誤也。

樓虛水經注作楊墟。

千乘郡溼沃案此縣之名當從濕水得名流俗誤以濕水之濕爲燥溼之溼而溼水則改爲溧溼字廢不用今此刻反以燥溼之溼當濕字用小學謬亂不可爬梳近日名公校此者俱未校出

博昌時水幽州瀛見職方

樂安水經注引應劭曰取休令之名

濟南郡鄒平臺鄒下誤空一格。平下誤連。顧氏已辨。南監版誤同。李賡芸云。魯國自有騶縣。古騶與鄒通。此濟南郡則當爲鄒平縣非鄒也。愚攷續志。濟南郡有臺縣。有鄒平縣水經注亦言臺縣。李說甚確。傳寫之誤。糾紛不可爬梳而續志。又以鄒平與下東朝陽誤連。世少善讀書者。有望而昧目耳。

朝陽郡國志作東朝陽下文猇縣蘇林注亦稱東朝陽。前南陽郡已有朝陽。則此合稱東。東字疑脫。而前注引應劭曰。在朝水之陽。朝水未知其審。而此注又引應劭云云。與前注同。必有一誤。與兩曲陽同注者正相似。

猇注。蔡蕃音由。音鴟。師古曰。蔡音是。音于虬反。由字下疑脫。一又字。南監亦脫。鴟。南監作鳩。是。是字下疑脫。一由字。南監亦脫。

泰山郡注云。汶水出萊母。西人濟。師古曰。母與無同。愚案。上文屬縣萊蕪之下。旣言原山、禹貢汶水出。南入沂。此郡名下何用重言之前言山水不在縣下而在郡名下。已爲自亂其例。此重複則尤爲冗謬。

博岱山在西北求山上。上一作下。其實皆非也。求山上三字當作兗州山。見職方。

蓋臨樂于山。洙水所出。西北至蓋入池水。于南監作子。水經二十五卷作臨樂山。酈注引此志同。本卷沂水篇注及尚書疏所引並同。然則作于作子皆衍字也。又酈引作至蓋入泗水。而其下又云。或作池字。蓋字誤也。則知池字在酈道元所見本已誤。本注又云。又沂水南至下邳入泗。青州滻詳見後案。禹貢沂在

徐州職方云青州篤者徐地周入青也。

萊蕪原山留水出東至博昌入沂幽州篤留禹貢作淄晉人改說文無淄字此猶存古傳南監作博是留水禹貢在青州而職方以爲幽州篤者青地周入幽也此注又說汶水已見上蒙陰禹貢蒙山在西南詳後案。

式郡國志作成云本國案左傳衛師入鄭杜預曰東平剛父縣西南有鄭鄉作式誤也。

北海郡有平壽縣壽光縣斟縣應劭以平壽爲古斗尋壽光爲古斗灌而班氏於斟縣自注云故國禹後攷史記夏本紀夏後有斟姓卽此斟故國禹後是也此其確然者而斟灌斟尋則事見襄四年傳魏絳哀元年傳伍子胥之言據彼杜注云二國夏同姓諸侯疏以爲世本文斟故國與平壽壽光二縣相近故應劭遂析言之杜預亦用之至於啟子太康失邦昆弟五人須于洛汭此書序文也夏都安邑本在河北如書序言則是太康爲羿拒逐於河南蓋河北之地皆爲羿所據矣太康崩弟仲康立仲康崩子相立此夏本紀文也據杜預謂相依於二斟則自太康以下三世皆因失國無歸而依同姓乃羿因夏民代夏政後又爲寒浞所弑浞使其子澆滅斟灌斟尋及夏后相夏遂絕祀直至相之遺腹子少康長而滅澆及其弟豶夏之遺臣靡復收灌尋餘燼以滅浞而少康返國則復歸於河北矣竊計羿浞相繼僭立者在安邑太康仲康后相繼擁虛號者在二斟此書序左傳與應劭杜預說之可信者宋末金履祥鄒季友說粗近但云太康居河南陽夏相

居河北帝丘。則不知何據。臣瓊乃依汲郡古文。太康居斗尋。羿亦居之。桀亦居之。然則魏絳安得云羿因夏乎。王制有因國。昭元年傳。商人是因。是若羿居斗尋。則非因矣。汲郡古文。東哲僞譏。何足爲憑。乃因此并謂斗尋在河南。不知斟故國在北海。去河道甚遠。且伍子胥謂少康祀夏配天。不失舊物。自是反國河北。而桀都亦在河北。詳予湯誓序案中。瓊說皆非也。斟說文十四上  
斗部無未詳

東萊郡腫有之罘山祠。居上山。聲洋洋。丹水所出。上山當作山上。聲洋洋未詳。其下文師古音洋洋爲祥。則非衍文矣。南監並同。而於所出之下又衍一丹字。

當利莽曰來萊亭來。南監作東。是。

琅邪郡長廣奚養澤在西。幽州藪見職方。

橫故山久久。南監作名。是。

東莞術水青州竊見職方。彼作沫。

裨說文。裨禾別也。从禾卑聲。琅邪有裨縣。此作裨。誤。南監同。此字去聲。而應劭於此注云音裨。藝文志。小說家出於裨官。如淳音排。則此字固有平聲矣。

東海郡不邳。萬嶧山在西。古文以爲嶧陽。萬當作葛。說詳後案。海曲。曲當作西。郡國志。廣陵郡海西。故屬東海。

續說文卷六下邑部作鄆。注云：姒姓國，在東海。祝其禹貢羽山在南。詳後案。

曲陽。注應劭曰：在淮曲之陽。此注前九江郡曲陽縣上亦引之。恐非。

都陽。錢大昭云：應劭曰：春秋齊人遷陽。是案此注又見城陽國陽都縣下。杜預左傳注云：陽國名。正義曰：杜世族譜土地名闕。不知所在。

鄙鄉。說文邑部云：鄙，東海縣。

臨淮郡。徐故國爲楚所滅。案楚南監作吳。是事見春秋昭公三十年。

𠂔猶。注𠂔音仇。說文卷十四下𠂔部人九切。三音不同。而彼云獸踩地。則非縣。惟卷二上口部云：𠂔从口九聲。臨淮有𠂔猶縣。然則作𠂔誤也。

播旌。郡國志作潘旌。

海陵。莽曰：亭閒閒。南監作門。

# 十七史商榷卷二十

## 漢書十四

### 地理雜辨證三

會稽郡下注云秦置高帝六年爲荆國十二年更名吳景帝四年屬江都案後廣陵國下注云高帝六年屬荆國十二年更屬吳景帝四年更名江都武帝元狩三年更名廣陵所屬廣陵縣下注云江都易王非廣陵厲王皆都此并得鄣郡而不得吳然則會稽不得云屬江都愚攷江都易王非傳景前二年立爲汝南王吳楚反自請擊吳吳已破徙王江都治故吳國師古曰治謂都之既云治吳則廣陵注云江都易王非都此者誤越絕書卷二吳地傳云漢高帝封劉賈爲荆王并有吳十一年淮南王英布反殺劉賈後十年高帝更封兄子濞爲吳王治廣陵并有吳立二十一年東渡之吳十日還去立三十二年反奔還東甌殺濞據此吳王濞實治廣陵而江都易王則治吳不都廣陵廣陵注所言江都易王都此者實誤都且在吳乃云不得吳更誤矣劉敞所駁大謬又攷高帝紀六年以故東陽郡鄣郡吳郡五十三縣立劉賈爲荆王十二年詔曰吳古建國日者荆王兼有其地今死亡後朕欲復立吳王其立沛侯濞爲吳王吳王濞傳高祖立濞

爲吳王王三郡五十三城其下文朝錯又言矣以兄子王吳五十餘城卽謂東陽郡鄣郡吳郡五十三縣也其下又言削吳會稽章郡書至吳國之有會稽顯然而江都因吳故封其得吳明矣廣陵厲王皆以元狩六年封本傳載其賜策言大江之南五湖之間則廣陵厲王之得吳明矣廣陵注與劉敞駁實皆誤也至於吳郡鄣郡等名皆非故秦郡史家隨便稱爲故不足泥又案史記夏本紀云禹會諸侯江南計功而崩因葬焉命曰會稽會稽者會計也裴駟注引皇覽曰禹冢在山陰縣會稽山上秦置郡本取此山爲名然郡守治所則治吳不治山陰項羽本紀秦二世元年九月項梁與籍殺會稽守殷通舉吳中兵八千人梁爲會稽守籍爲裨將乃渡江而西此所謂吳中卽今蘇州府治吳長洲元和三縣地也嚴助朱買臣拜會稽太守皆其地

吳具區澤在西揚州藪古文以爲震澤南江在南揚州川震澤詳後案藪與川皆見職方南江者松江也職方云其川三江故班以此與下文毗陵北江及丹楊郡蕪湖之中江當之

毗陵江在北揚州川江上脫北字南監同

山脊柴辟故就李鄉吳越戰地柴當讀如寨辟當讀如壁

錢唐西部都尉治案越絕書二卷六漢文帝前九年會稽并故鄣郡太守治故鄣都尉治山陰前十六年太守治吳郡都尉治錢唐觀此則似會稽止一都尉下文回浦南部都尉治疑後來增設但前漢既有西

部亦宜有東部。金石錄載永平八年會稽東部都尉路君闕銘。吳志張紘亦爲會稽東部都尉。而後漢循吏伍延傳嘗爲會稽西部都尉。則後漢固東西並設。志稱建武六年省諸部都尉。旣經省併。不應後漢所有前漢反無此志。未知有脫漏否。

治師古曰。本閩越地。回浦南部都尉治。攷縣名治當作治。南監本誤同。班氏以二縣連書。而郡國志。章安故治閩越地。光武更名。注引晉元康記曰。本鄞縣南之回浦鄉。章帝章和元年立。而無回浦縣。案嚴助傳。閩王舉兵於治南。蘇林曰。山名今名東治。治之爲閩越無疑。但後漢於改名章安者。必是併治與回浦二縣爲一。而改名之。師古當於回浦下注云。此與治皆本閩越地。不當但於治言之。

嚴助傳。會稽東接於海南。近諸越。北枕大江。三語已盡前漢會稽形勢。後漢順帝分吳海鹽、烏程、餘杭、毘陵、丹徒、曲阿、由拳、富春、陽羨、無錫。婁別爲吳郡。則今鎮常蘇太松嘉湖杭七府一州地也。北境俱屬吳。惟南境仍爲會稽。司馬彪於會稽郡下自注云。秦置本治吳。立郡吳。乃移山陰。立郡吳。當作立吳郡。傳寫誤。會稽本山陰山名。以此名郡而治吳。名實乖矣。吳郡治吳爲是。

丹揚郡。故鄣郡。屬江都。武帝元封二年更名丹揚。揚字从手。其屬縣丹陽則从阜。而南監版俱作陽。攷晉書地理志。或作揚。或作陽。紛紛不一。而屬縣則作楊。且注云。丹揚山多赤柳在西也。然則縣名从木甚明。而郡亦當以此得名。凡从手从阜。疑皆傳寫誤也。唐許嵩建康實錄第一卷解禹貢揚州引春秋元命包云。厥土下溼而多生楊柳。以爲名揚州之揚从手。今巡

釋雅注以爲人性。劉敞曰：秦分三十六郡，無鄣郡。此注但當云故鄣屬江都，不當益郡字。愚案：劉說似是而非。辨已見前。故鄣郡屬江都者，乃謂武帝之前此郡地名鄣郡，屬江都國耳，豈謂秦哉？如劉云云，則但故鄣一縣屬江都乎？不通極矣。鄣郡非秦郡名也。而高帝紀云：六年以故東陽郡、鄣郡、吳郡立劉賈爲荆王。廣陵國注云：高帝六年屬荆國。十二年更屬吳。景帝四年更名江都。武帝元狩三年更名廣陵。江都、廣陵皆并得鄣郡。以上所說郡名，其中居然有鄣郡。或係楚漢分爭之際，暫置復廢。其後得稱故郡，不必秦郡方得稱。故當秦三十六郡時，此郡所屬十七縣地既非丹楊郡，又非鄣郡，皆是會稽郡地耳。劉昭亦誤以秦有鄣郡。

於贊師古音潛郡國志直作潛。

故鄣胡三省通鑑注云：漢屬丹楊郡。其地本秦鄣郡所治，故曰故鄣。今廣德軍是故鄣縣之地。文獻通攷：古揚州秦郡五，有鄣郡、會稽郡、九江郡。秦無鄣郡。說已詳上。胡三省馬端臨皆非。

句容、涇容下空一格，是監誤脫容字，又與涇誤連。凡毛是監非不悉出聊一見之。

丹楊楚之先熊繹所封。十八世文王徙郢。郢卽南郡江陵縣。江陵卽今縣。湖北荊州府治。說已見前。而丹

楊則爲今太平府當塗縣之南境。地與寧國府連界處也。據乾隆十八年寧國府志，宋敷所修寧國府志，似當有本音，古陶回傳蘇峻之亂，回請早出兵，守江口，峻將至，回復謂庾亮曰：峻知石頭有重戍，不敢直下，必向小丹楊南道步來，宜伏兵要之。史記楚

亮不從，峻果由小丹楊疑卽當塗南境地名。漢武帝以此改郡名爲丹楊郡。

世家云成王封熊繹於楚居丹楊即此是矣乃徐廣注則云在南郡枝江縣山海經丹山在丹陽南郭璞注云今建平郡丹陽城秭歸縣東七里水經酈道元注云丹楊城據山跨阜周八里二百八十步東北悉臨絕澗南枕大江嶮峭壁立楚熊繹始封丹陽之所都也地理志以爲吳之丹楊尋吳楚悠隔繼縷荆山無容遠在吳境非也於是沈括夢溪筆談王楙野客叢書王應麟詩地理攷及通鑑地理通釋皆主此據晉人及北魏人說不信班氏畢竟班氏是後儒皆未必然左傳華路藍縷以啓山林宣十二年文指若敖藍縷啓山在荊山華路藍縷跋涉山林昭十二年文則指熊繹言酈引此駁班似也但楚境大矣即使丹楊郡之丹楊必吳境非楚境乎志末總論一段以丹楊爲吳分此班氏就晚周之吳境言之耳其實丹楊未必吳始封卽得也後書王郎傳有丹陽李贊亦云在秭歸蓋名同地異

石城分江水首受江東至餘姚入海此條實不可解當闕疑詳後案揚州及導漢東爲北江入于海導江東爲中江入于海之下此分江水據胡氏渭禹貢錐指謂在今池州府貴池縣考石城縣屬丹楊後漢同音改屬宣城郡隋平陳改名秋浦仍屬宣城唐書謂唐析宣城之秋浦南陵二郡治貴池縣無秋浦縣蓋即秋浦所改名也然則錐指此條確甚

勸師古曰晉伊字本作夥音同案勸水經注卷四十漸江水篇引之正作夥說文卷十一上水部漸字注同又卷十上黑部云夥黑木也从黑多聲丹陽有夥縣若從幼安得有伊音直傳寫誤耳師古於小學全

不通。

豫章郡彭澤禹貢彭蠡澤在西詳後案歷陵傅易川古文以爲傅淺原詳後案。

安平後漢更名平都。

桂陽郡來陽來說文作郴注春山春水所出春南監作春疑是。

武陵郡鐸成玉山潭水出東入鬱其下注引應劭曰澤水出入鬱音淫孟康曰鐸音譚師古曰孟音是宋本潭皆作鐸以縣名及應音參之作鐸是南監既脫作潭又脫去音淫及師古云云竟不可讀。

西陽應劭曰西水所出案下文充縣山西水所出此注疑有誤。

恨山孟康曰音恆出藥草恆山末二字衍南監同。

零陵郡零陵陽海山湘水出水經三十八湘水篇湘水出零陵始安縣陽海山注云卽陽朔山也應劭曰鍾武應劭曰今重安案重安後漢永建三年改。

漢中郡沔陽沔水出武昌東南入江昌南監作都是此誤。

廣漢郡汁方注汁音十南監汁皆作什功臣表汁防侯雍齒汁音什防音方續志又作什邡皆古字通。

荀明應音家盲師古明音萌水經注作萌此縣下當有潛水班失載詳後案

甸氏道李奇曰甸音媵師古音食證反案甸古讀爲乘又或爲歛詳周禮軍賦說一卷又此道與剛氏道陰平道續志俱屬廣漢屬國

曰水應劭曰云云與上文甸氏道下班氏自注重出非也

陰平道莽曰摧虜摧字脫從南監增

蜀郡禹貢桓水出蜀山案此卽梁州和夷底續之和詳後案

鄆禹貢江沱在西案此說鄭康成駁之詳後案

青衣禹貢蒙山谿大渡水東南至南安入濊濊當作涐師古音哉非詳後案

江原酈水云云鄭康成以爲沱詳後案

湔氏道禹貢嶓山在西徼外江水所出東南至江都入海過郡七行二千六百六十里案江水所經於漢爲蜀郡犍爲巴郡南郡長沙江夏豫章廬江丹楊會稽廣陵凡十郡一國而志云過郡七蓋江都在江北據北岸言之故不數南岸長沙豫章丹楊會稽也閻若璩曰水經江水東過夷陵縣南注說宜昌縣流頭灘而引袁山松曰自蜀至此五千餘里干寶晉紀吳使紀陟如魏司馬昭問吳戍備幾何對曰西陵至江都五千七百里宜昌今宜都縣在西陵之東自江發源松潘至此四千四五百里西陵今宜昌府治東湖

縣自此至江都不致四千里山松與陟言皆夸然其計亦當有八千餘里二當作八閻說精絕

越巂郡祚秦續志作祚奏

三絳續志作三縫

青蛤水經卷三十七淹水篇作蜻蛤注云僕水出徼外東南至來惟惟南監作唯益州有來唯南監是又云則禹同山有金馬碧雞據水經注則字衍

益州郡弄棟說文卷六上木部作桺云桺木也从木弄聲益州有桺棟縣

牂柯郡談指指南監作搘說文十二上手部搘給也从手臣聲竟刃切續志仍作搘今人雖不識搘字然北方以物擲與人猶有搘音說文字今人廢不用者多此字既見此志宜存之進桑續志作進乘水經注有進桑關此注亦云有關疑作乘非

巴郡僰江孟康音重疊之疊續志同說文卷八上衣部云裯重衣也从衣執聲巴郡有僰江縣从土非朐忍師古音劬續志同韓昌黎盛山十二詩序作朐忍通典一百七十五卷州郡篇同說文卷四下肉部有朐字無忍字不知何時復譌爲朐忍讀書蟲閨徐氏援入新附注云蟲名漢中地下溼多此蟲因以爲名恐係後人妄造

自漢中以下諸郡皆屬益州莽旣逐郡改其名班氏並注明而莽又改益州爲庸部見後書公孫述傳及

廉范傳注班氏則略而不載。

武都郡武都續志作武都道注東漢水云云沮沮水云云俱詳後案又於沮水之下云荊州川見職方隴西郡注隴坻在其西也西當作東

氏道禹貢養水所出養與漾樣同詳後案

首陽禹貢烏鼠同穴山在西南渭水出詳後案

臨洮洮水東入西西南監作河是又云禹貢西頓山在縣西詳後案

西禹貢嶓冢山西漢所出云云詳後案

金城郡河關積石山在西南羌中河水行塞外東北入塞內至章武入海過郡十六行九千四百里章武屬勃海河所過郡據鄭康成尚書注當爲金城天水武威安定北地朔方五原雲中定襄雁門西河上郡河東馮翊河南河內魏郡鉅鹿東郡清河平原信都勃海凡二十三郡此言十六疑有闕漏詳後案允街莽曰修遠上允吾已有此文誤

臨羌有弱水昆侖山祠此弱水殆卽昆侖山下之水非導之至合黎者昆侖詳後案又注西有畢和羌畢南監作卑

天水郡望垣續志作望恆

冀說文卷十上馬部作驥云天水有驥縣又注禹貢朱圉山詳後案

武威郡武威休屠澤古文以爲猪塗詳後案猪南監作豬是

張掖郡刪丹桑欽以爲道弱水自此西至合黎居延居延澤古文以爲流沙俱詳後案

敦煌郡效穀師古曰本漁澤障也桑欽說云云漁南監作魚是胡渭曰師古曰三字後人妄加此非師古所能引也地理志引桑欽者六皆班氏原注桑欽傳孔壁真古文尚書者地理志亦引禹貢古文山水十一條皆孔安國義則知班氏好古此效穀下桑欽說亦必班氏原注也胡說確甚

安定郡涇陽升頭山在西禹貢涇水所出東南至陽陵入渭過郡三行千六十里雍州川案毛詩郿風谷風疏引鄭康成尚書注所引地理志作行千六百里且其上文先說涇水自發源至入渭幾二千里禹貢疏所引地理志亦作千六百里今毛刻及南監皆作六十誤也餘詳後案雍州川見職方

祖厲祖音置南監作音置是續志作租

鶴陰續志作鶴陰

北地郡直路沮水出東詳後案

鶴孤續志作鶴觚

歸德洛水出北蠻夷中詳後案

弋居有鹽官續志云有鐵。

大豐注豐卽古要字詳後案衡漳節後書鄧禹傳分遣將軍別攻上郡諸縣歸至大要注大要縣名屬北地郡上郡莽改爲增山見後書馬援傳援之兄員爲增山連率注云連率亦太守是也班氏於莽所改郡縣之名皆載而間亦有漏去者。

上郡白土圓水出西東入河水經注東作南。

西河郡鯢是說文卷四下角部作鯢氏云鯢角鯢曲也西河有鯢氏縣古氏與是通見洪範後案又禹貢桓是卽桓氏。

朔方郡渠搜莽曰溝搜水經注云莽曰溝搜亭。

五原郡文國續志作父國。

捕澤南監作蒲澤。

南興水經注作南興成宜中部都尉治原高水經注作原亭。

樞陽此出石門障此南監作北是。

定襄郡武泉荒于水出塞外水經注作芒于水。

代郡平邑續志作北平邑。

廣昌涑水并州瀦見職方

上谷郡軍都溫餘水東入洛洛南監作沽是

上谷郡寧續志作甯

且居樂陽水出東東入海下東南監作南是

漁陽郡泉州有鹽官續志云有鐵

右北平郡石成南監作石城

驪成大揭石山在西南詳後案

遼東郡文續志作汝注莽曰受亭南監作文亭是

番汗沛水出塞外西南入海應劭曰汙水出塞外西南入海番音盤師古曰沛音普蓋反汙音寒南監無應劭曰以下十二字則番音盤似班氏自音矣無此例也且師古先音沛後音汙所音卽音應邵汙水非縣名之汙也南監似妄人刪去非是近何氏校本據宋本無應劭曰三字亦無解於番字爲班自音之非若移師古曰三字於番音盤之上又太專輒宜從毛刻

沓氏應劭曰氏水也師古曰凡言氏者皆謂因之而立名氏水南監作沓水觀師古注卽解應注宜從毛刻

玄菟郡西蓋馬續志馬作烏。

樂浪郡東曉說文卷七上日部云曉日行曉曉也樂浪有東曉縣讀若醜。南海郡中宿有洭浦官官卽關也管叔墨子作關叔說文卷十一上水部云洭水出桂陽縣蘆聚山洭浦關爲柱水。

鬱林郡說文卷五下鬯部云鬱芳艸也遠方鬱人所貢鬱今鬱林郡也从日缶口鬯彔其飾也。交趾郡口七十四萬六千三百三十七下脫去十字。

安定續志作定安。

虯洽馬援傳注引越志同但說文卷七上米部云虯潰米也从米尼聲交趾有虯洽縣武移切應劭音彌與說文合从鹿非聲傳寫誤也水經三十七卷葉榆水篇又作虯皆非九真郡無切續志及馬援傳皆作無功。

日南郡西捲續志作西卷。

